



Forskrift om vass- og avløpsgebyr Ål kommune, Viken

Med kommentarar og rettleiingstekst

Innleiing

Dette dokumentet gir rettleiing og hjelp til tolking og bruk av vass- og avløpsforskrifta til kommunen. Kommentarutgåva av forskrifa er meint for både saksbehandlarar og innbyggjarar i kommunen, og dessutan andre som bruker VA-forskrifta. Arbeidsgruppa har prøvd å halda rettleiingsteksten så enkel og daglegdags som mogleg for å gjera rettleiinga lett tilgjengeleg for flest mogleg. Det kan gjera at rettleiingsteksten får ei litt anna tyding enn dei spesifikke, juridiske omgrepene som er brukte i forskriftsteksten. Viss rettleiingsteksten motseier eller ikkje samsvarer med forskriftsteksten er det forskriftsteksten som gjeld og blir sett på som riktig.

Rettleiingstekst er markert med ramme og farge, slik som dette avsnittet. Rettleiingstekst er for det meste plassert etter kvart ledd (avsnitt) i paragrafan, men nokre gonger er det òg skrive generell rettleiingstekst til ein heil paragraf eller eit kapittel rett under paragraf- eller kapitteloverskrifta.

Rettleiingsteksten viser til andre føresegner i forskriftena der det er relevant. Dei fleste av desse tilvisingane er intern-lenker i dokumentet, som kan klikkast på i digitale utgåver av dokumentet for å hoppa direkte til punktet det blir vist til.

Den første utgåva av rettleiinga er gitt ut i samband med at den nye gebyrforskrifta til kommunen for vass- og avløp trådde i kraft 1. januar 2022. I denne utgåva har vi prøvd å svara på vanlege spørsmål og saker kommunen har fått til behandling dei siste åra, samtidig som vi har prøvd å føresjå kva nye spørsmål som kan dukka opp som følgje av endringar i den nye forskriften. Planen er å halda denne rettleiinga oppdatert og tilgjengeleg på nettsidene til kommunen, etter kvart som vi får nye spørsmål og forvaltningspraksisen på vass- og avløpsområdet utviklar seg. Viss du har innspel til rettleiinga set vi stor pris på om du sender dei til oss på postmottak@aal.kommune.no.

Innhaldsliste

Kapittel 1. Generelle føresegner	1
§ 1-1 Føremålet med forskrifa.....	1
§ 1-2 Definisjonar.....	1
§ 1-3 Generell gebyrplikt	3
§ 1-4 Gebyrtypar	4
§ 1-5 Gebrysatsar	4
§ 1-6 Arealberekningsmetode.....	5
Kapittel 2. Tilknytingsgebyr	6
§ 2-1 Gebyrplikt.....	6
§ 2-2 Utforming av gebyra.....	7
§ 2-3 Ansvar og betaling	7
Kapittel 3. Årsgebyr	8
§ 3-1 Gebyrplikt.....	8
§ 3-2 Gebyret sitt oppbygnad.....	8
§ 3-3 Abonnementsgebyr.....	8
§ 3-4 Forbruksgebyr	9
§ 3-5 Betaling etter målt forbruk.....	10
§ 3-6 Betaling etter stipulert forbruk.....	11
§ 3-7 Reduksjon av eller tillegg til årsgebyr	11
§ 3-8 Gebyrreduksjon i medhald av forbrukerkjøpsloven sine reglar om prisavslag	13
§ 3-9 Pålegg om utbetring	14
§ 3-10 Ansvar for opplysingar om abonnement.....	14
§ 3-11 Ansvar for gebyra.....	14
§ 3-12 Retting av feil gebyrberekning	15
Kapittel 4. Føresegner for installasjon og bruk av vassmålar	15
§ 4-1 Målartypar	15
§ 4-2 Installasjon	15
§ 4-3 Eigarforhold og kostnadars	16
§ 4-4 Avlesing av vassmålar	17
§ 4-5 Tilsyn og vedlikehald	17
§ 4-6 Avrekning ved feilmåling	18
§ 4-7 Nøyaktigheitskontroll	18
§ 4-8 Utskifting og flytting	18
Kapittel 5. Innbetaling av årsgebyr	19
§ 5-1 Innbetaling	19
§ 5-2 Manglande innbetaling.....	19
Kapittel 6. Avsluttande bestemmingar	20
§ 6-1 Klage og omgjering	20
§ 6-2 Ikraftsetjing	20

Kapittel 1. Generelle føresegner

§ 1-1 Føremålet med forskrifa

Forskrifta fastset utrekningsmåte og gebyrplikt for kommunen sine vass- og avløpstenester.

Formålet med forskrifta seier noko om kva forskrifta handlar om, og dermed kva den inneholder reglar om. Denne føresegna må bli lest saman med definisjonane i § 1-2 og reglane om kven som skal betala gebyr i § 1-3 for å kunne sei nøyaktig kven som blir omfatta av reglane i forskrifta.

§ 1-2 Definisjonar

Denne paragrafen inneholder ei liste over definisjonar som blir nytta i forskrifta og i forvaltningsarbeidet med vass- og avløpstenestene. Nokre ord og uttrykk er definerte her sjølv om dei ikkje blir nytta vidare i forskrifta, fordi då har ein felles definisjonar av omgrepa som kan nyttast når kommunen til dømes skal skrive vedtaksbrev til abonnentane.

Definisjonane av eigedom (bokstav a), abonent (bokstav b), bueining (bokstav i), bustad- og næringseigedom (bokstav j og l) er spesielt viktige og blir nytta mykje i resten av forskrifta.

I denne forskrifta meinast med:

- Eigedom: Fast eigedom registrert med eige gards- og bruksnummer, eige festenummer eller eige seksjonsnummer i matrikkelen. Seksjon etablert i høve til lovgivinga om eigarseksjonar vert rekna som sjølvstendig eigedom.

Kvar unike kombinasjon av gards-, bruks-, feste- og/eller seksjonsnummer utgjer éin eigedom. Gards-, bruks-, feste- og seksjonsnummer for ein eigedom er registrert i «Matrikkelen», eigedomsregisteret i Noreg. Alle eigedommar har gards- og bruksnummer, men berre eigedommar som er festa og/eller seksjonert har feste- og/eller seksjonsnummer. For eigedommar som ikkje er festa eller seksjonerte er feste- og seksjonsnummeret lik null (0).

I forskrifta blir det presisert at seksjonerte einingar utgjer ein eigen eigedom. Konsekvensen av det er at eit burettslag berre blir rekna som éin eigedom, uavhengig av kor mange leilegheiter burettslaget består av, medan sameige med seksjonerte bueiningar blir rekna som mange eigedommar. På [seeiendum.no](#) kan kven som helst søke i eigedomsregisteret og kontrollera opplysningane om sin eigen eigedom. Matrikkelførte opplysningar om ein gitt eigedom kan òg fåast ved førespurnad til kommunen.

Definisjonen av eigedom er viktig, fordi vass- og avløpsanleggslova § 3 mellom anna seier at det er fast eigedom som er knytt til kommunalt leidningsnett som utløyser plikt til å betale gebyr.

- Abonent: Eigar eller festar av eigedom som er tilknytt kommunen sitt vass- og/eller avløpsanlegg, eller som er godkjend eller kravd tilknytt. Festar av eigedom skal stå som abonent når gjenståande festetid da gebyrplikta oppstod var 30 år eller meir, eller festar har rett til å få festeavtalen forlenga slik at samla festetid frå gebyrplikta oppstod vil kunne bli 30 år eller meir. I burettslag er burettslaget abonent. I eigarseksjonssameige er kvar eigarseksjon ein abonent.

Kvar eigedom har ein «abonent» som har eit kundeforhold med kommunen og er den som får gebyrfakturaen. Definisjonen her følgjer reglane i vass- og avløpsanleggslova § 3 og hovudregelen er at eigar av eigedommen er abonenten. Viss eigedommen er festa bort for lengre tid er festar abonent i staden for eigar.

Definisjonen heng saman med kva som er «ein eigedom». Dermed vil burettlagsselskapet vera abonenten for eit burettslag, sidan kvar bueining *ikkje* er ein eigen eigedom. I seksjonerte bustadsameiger er kvar bueining sin eigen eigedom, så der er eigaren av kvar bueining abonenten.

Dei fleste reglane i denne forskrifta regulerer rettane og pliktene til abonenten eller forholdet mellom abonenten og kommunen.

- Abonnement: Avtale mellom abonent og kommunen om vass- og avløpstenester gjennom tilknyting av sanitærinstallasjonar og private vass- og avløpsanlegg til kommunen sine vass- og avløpsanlegg. Det er ikkje ein føresetnad at avtalen er skriftleg. Avtale om tilknyting via privat fellesleidning vert rekna som abonnement.

Abonnementsforholdet mellom kommunen og kvar abonent blir òg regulert av ein del privatrettslege reglar, i tillegg til lovane og forskriftene som styrer korleis kommunen skal levera vass- og avløpstenester. «Privatrettsleg regulering» betyr i korte trekk at sidan kommunen eig vass- og avløpsanlegga kan kommunen bestemme korleis tenesta skal drivast og stille krav til dei som er kopla til leidningsnettet, som om kommunen var ein vanleg bedrift og ikkje ein offentleg etat.

Kommunen gjer det gjennom reglane i denne forskrifta og «Standard abonnementsvilkår for vann og avløp» som er utarbeidd av Kommunenes Sentralforbund og vedtatt av kommunestyret. Standard abonnementsvilkår inneholder tekniske og administrative føresegner og gjeld for kvar abonnent. Abonnementsvilkåra finst mellom anna på va-jus.no: <https://va-jus.no/standard-abonnementsvilkar/>

- d. Sanitærinstallasjonar: Abonnenteigde rør, installasjonar og utstyr innanfor husets yttervegg, som er tilknytt vass- og/eller avløpsanlegg.

«Sanitærinstallasjonar» er alt av vass- og avløpsutstyr som finst inne i huset. Dette er ting som toalett, kjøkkenvask, dusj og røyra som gjer at dei verkar som tiltenkt.

- e. Privat vass- og avløpsanlegg: Abonnenteigde private leidningar (stikkleidningar) og utstyr utanfor husets yttervegg, som er tilknytt offentleg vass- og/eller avløpsanlegg.

«Privat vass- og avløpsanlegg» er leidningane og anna utstyr som koplar huset til hovudleidningen til kommunen. Abonnenten eig leidningen frå tilkoplingspunktet på hovudleidningen, som beskrive i standard abonnementsvilkår administrative føresegner punkt 1.3. Det er abonnenten som har ansvaret for at den private stikkleidningen er i forsvarleg stand, sånn at ikkje unødvendig mykje vatn lek ut eller det blir for stor fare for innlekk av bakteriar og anna som kan forårsaka fare for liv og helse.

Sjå òg § 3-9 på side 14 for meir om plikta abonnenten har til å halde vass- og avløpsanlegga sine ved like.

- f. Avløpsvatn: Både sanitært og industrielt spillvatn og overvatn.

Dette følgjer definisjonen i forureiningslova § 21 andre ledd. «Spillvatn» er vatn som blir sloppet ut etter å ha vore brukt til noko, til dømes til å dusje, i eit toalett eller som del av ein produksjonsprosess. «Overvatn» er regn- og smeltevatn som ikkje trekker ned i bakken fordi det er bygd noko som hindrar det, til dømes regnvatn som blir liggande oppå ein asfaltert parkeringsplass eller vatn som treffer eit hustak og renn ned i ei takrenne.

Definisjonen gjer at også kostnader til handtering av overvatn kan inkluderast i avløpsgebyret når overvatnet blir sloppet på det kommunale leidningsnettet.

- g. Bygg/bygning: Konstruksjon/byggverk med eige bygningsnummer i matrikkelen.

Definisjonen seier noko om kva som skal rekna som ein «bygning» der det er relevant for å tolke føresegnene i forskrifta eller gi enkeltvedtak overfor ein abonnent.

I tillegg til at alle bygningar høyrer til ein eide dom (sjå definisjon i bokstav a), har dei aller fleste bygningane eit unikt bygningsnummer i matrikkelen. Tildeling av bygningsnummer heng saman med kva som er søknads- eller meldepliktige byggetiltak etter plan- og bygningslova, så nokre små konstruksjonar som dokkestuer, mindre uthus og liknande vil typisk mangle bygningsnummer.

- h. Brukseining: Bygning eller del av bygning (lokale), til dømes bustad, kontor, verkstad og lager.

«Brukseining» er den overordna kategorien for alle delar av ein bygning med eit eller anna tiltenkt bruksområde. «Bueining» er ein type brukseining, men «bruksseining» omfattar òg bygningsdeler som ikkje er bueininger, som eit kontor, ein verkstad eller eit butikklokale. Ein bygning med butikklokale i første etasje og leilegheit i andre etasje har to brukseiningar.

- i. Bueining: Brukseining som er definert som bustad eller bueing i matrikkelen. Som bueing rekna kvar og ei brukseining som har minst eitt rom og eigen inngang, og der ein har tilgjenge til vatn og toalett utan å gå gjennom anna brukseining.

1. Utleigerom i ein privat bustad: Det som på folkemunne ofte blir omtala som hybel eller utleigerom rekna ikkje som sjølvstendig bustad, sidan ein må gå gjennom andre sin bustad for å komme til eige rom.
2. Hyblar i hybelbygg: Kvar hybel rekna som sjølvstendig bustad, sjølv om bebuarane deler viktige funksjonar som kjøkken og/eller bad. Kjøkken, bad og gang som deles av fleire bebuarar rekna som fellesareal og ikkje sin eigen del av andre sin bustad.

«Bueining» er ein spesiell type brukseining, som er meint å brukast til bustad over tid. Definisjonen i forskrifta følgjer definisjonen i [byggesaksforskriften](#) og [føringsinstruksen for matrikkelen](#). Hensikta er at definisjonen til kommunen av bueing skal vere lik som elles i lovverket. Andre setning i definisjonen viser likevel at det ikkje er eit krav etter vass- og avløpsforskrifta til kommunen at ei buforeining er registrert som eiga bueing. Det er heller ikkje noko krav om at ho kan registrerast som eiga bueing – så lenge kravet om at brukseininga har minst eitt rom, eigen inngang, vassforsyning og toalett er oppfylte vil det rekna som ei eiga bueing etter denne forskrifta.

Underpunkt 1 viser at eit einskildrom som leiest i bustaden til nokon andre ikkje blir rekna som eiga bueing, medan underpunkt 2 viser at bueininger som delar viktige fellesfunksjonar, til dømes i eit hybelbygg, framleis blir rekna som separate bueininger.

Ei leilegheit i ei bustadblokk vil altså reknast som ei bueining enten ho er seksjonert eller ei. Dette betyr at tal bueiningar i ei bustadblokk er uavhengig av om blokka er organisert som burettslag eller eigarseksjonssameie. Leilegheitene blir framleis rekna som eigne bueiningar sjølv om dei til dømes har felles toalett i gangen og/eller felles kjøkken.

Ein bygning med butikklokale i første etasje og leilegheit i andre etasje har to brukseiningar, men berre éi bueining.

j. Bustadeigedom: Eigedom med bygg som vert brukt til bustadføremål, medrekna fritidsbustad. Bygningstype 111–163 etter NS-3457.

1. Fritidseigedom: Eigedom der alle bustadbygg er registrert som fritidsbustad i matrikkelen.
2. Fritidsbustad: Registrert i matrikkelen med bygningstype 161–163 etter NS-3457.

NS-3457 er ein standard for klassifisering av bygningar etter kva dei vert brukte til. Bygningstypar som byrjar med 1 er forskjellige typar bustader, medan alle bygningstypar som byrjar på 2 eller eit høgare tal, er bygningar som ikkje blir rekna som bustad, t.d. skule, rådhus, bensinstasjon mv.

Viss eigedommen blir nytt til noko anna enn bustad blir han rekna som eit næringsbygg (sjå definisjon i bokstav I). Viss bygningen blir nytt til både bustad og til andre ting blir han rekna som «kombinasjonseigedom» (sjå definisjon i bokstav K). Underpunkt 1 og 2 har tilleggsdefinisjonar for fritidsbustad og eigedommar der alle bygningane er fritidsbustader.

Viss ein bygning skal brukast til noko anna enn han er registrert som, må ein vanlegvis søke kommunen om lov til bruksendring.

k. Kombinasjonseigedom: Eigedom med ei eller fleire bueiningar, i tillegg til ei eller fleire brukseiningar som ikkje er bustad. Eigedom med ei eller fleire bueiningar i tillegg til ei eller fleire bygningar for fiskeri eller landbruk vert klassifisert som kombinasjonseigedom.

Alle eigedommar med minst éi bueining og minst ei brukseining som ikkje er bueining er «kombinasjonseigedommar». Sjå òg definisjon på bueining i bokstav I og brukseining i bokstav H.

Definisjonen verkar inn på mellom anna korleis den faste delen av årsgebyret blir rekna ut.

Ein bygning med butikklokale i første etasje og leilegheit i andre etasje er ein kombinasjonseigedom. Definisjonen gjer òg at dei fleste gardsbruk er kombinasjonseigedommar, sidan dei har både bustad- og driftsbygningar (fjøs, låvar og liknande). Sånn er det òg sjølv om driftsbygningane ikkje er i bruk – det er bygningens tiltenkte og/eller registrerte føremål som er avgjerande. Dette er ei endring av praksis frå tidlegare, så forskriftera inneheld ei overgangsordning for dei abonnentane dette gjeld. Overgangsordninga er nærmere omtala i § 1-6 tredje ledd.

l. Næringseigedom: Eigedom som ikkje er bustad, fritidsbustad eller kombinasjonsbygg. Bygg for offentlege føremål vert klassifisert som næringsbygg.

Eigedommar som ikkje inneheld nokon bueiningar er næringseigedommar. Sjå òg definisjon av bueining i bokstav I.

m. Bruksareal (BRA): Bruksareal for eigedom som er registrert i matrikkelen og rekna med utgangspunkt i NS-3940.

Definisjonen gjer at kommunen har éin stad å finne opplysningar om eigedommen (matrikkelen), samtidig som grunnlaget for gebyra blir godt dokumenterte og reglane er like for alle abonnentar. Arealet i matrikkelen skal vere rekna med utgangspunkt i NS-3940 «Areal- og volumutrekningar av bygningar», og regelen følgjer òg reglane i byggtknisk forskrift § 5-4.

Viss ein abonent meiner at grunnlaget i matrikkelen er feil, bør dokumentasjon på riktig grunnlag sendast til kommunen slik at dette blir retta.

Bruksareal verkar inn på mellom anna årsgebyret for abonnentar med stipulert forbruk. Sjå òg § 1-6 på side 5, § 3-4 på side 9 og § 3-6 på side 11.

§ 1-3 Generell gebyrplikt

Plikta til å betale vass- og/eller avløpsgebyr gjeld følgjande abonnentar:

- a. Fast eigedom som er tilknytt kommunal vass- og/eller avløpsleidning, direkte eller gjennom privat samleidning.
- b. Eigedom som kommunen i medhald av plan- og bygningsloven § 27-1 eller § 27-2 har kravd tilknytt kommunal vass- og/eller avløpsleidning.

Denne regelen seier kven som skal betale gebyr. Det gjeld for det første alle eigedommar som er tilknytt kommunalt leidningsnett, òg viss tilknytinga skjer ved at fleire delar på stikkleidningen. Det kan til dømes skje viss eitt hus har tilknyting direkte til hovudleidningen til kommunen, medan nabohuset får vatn via denne stikkleidningen.

Ein betaler berre gebyr for det som eigedommen er kopla til. Til dømes vil ein eigedom med tilkopling til kommunalt vatn og eiga privat avløpsløysing (t.d. septiktank), berre betale vassgebyr etter denne forskrifa. Abonnenten til eigedommen må òg betale gebyr for tømming av septiktanken, men det blir regulert av ei anna kommunal forskrift.

Den andre gruppa abonnentar som må betale gebyr er dei som eig eller festar eigedom kommunen har kravd tilknytt i tråd med reglane i plan- og bygningslova. Her vil det gjelda eit enkeltvedtak som pålegg tilknyting, og kommunen vil sende krav om å betale gebyr frå tidspunkta som er beskrivne i § 3-1 på side 8. Enkeltvedtak om tilknyting kan klagast på til kommunen, sjå § 6-1 på side 20.

Det er abonnementen som er ansvarleg for å betale gebyret til kommunen, sjå definisjon av «abonnement» i § 1-2 bokstav b på side 1.

§ 1-4 Gebyrtypar

Gebrytypane er:

- a. Eingongsgebyr for tilknyting til vatn og avløp.
- b. Årsgebyr for vatn og avløp (summen av fast og variabel del).

Vatn og avløp er to separate gebyrområde, fordi det kan hende ein abonnement berre har tilknyting til éi av tenestene og då skal dei ikkje betala for den andre tenesta. I denne forskriften blir tenestene for det meste omtala samla likevel, fordi reglane stort sett er like for begge tenestene.

At tenestene er delte inneber mellom anna at ein eigedom som blir kopla til både vatn og avløp må betale eingongsgebyr for tilknyting til kvar av tenestene. På same måte er det òg to forskjellige gebrytypar for begge tenestene. Det betyr at ein eigedom som har privat vassforsyning og er eller skal koplast til avløpsnettet til kommunen, berre svarer for eingongs- og/eller årsgebyr for avløp. Det er § 1-3 i forskriften som avgjer om ein eigedom skal betale gebyr for vatn, avløp eller begge deler.

I tillegg kan kommunen krevje betaling etter standardiserte satsar for kommunen sine kostnadar ved avlesing av vassmålar, samt avstenging og påsetting av vassforsyning.

Det er eit grunnleggande utgangspunkt for sjølvkosttenester at kvar abonnement skal betale for den tenesta ho får, verken meir eller mindre. Reglane for utrekning tillèt stor grad av utjamning mellom abonnentar av praktiske omsyn, men det er likevel eit mål som dannar utgangspunkt for prinsippa om fordeling av kostnader. Dette er éin av dei, og seier at viss ein abonnement påfører kommunen ekstra kostnader utover det ein vanleg abonnement gjer, kan kommunen i nokre tilfelle krevja kostnadene dekt av abonnementen gjennom standardiserte satsar for det arbeidet kommunen må utføra. Det kan vera arbeid som å lese av vassmålaren, når abonnementen ikkje har gjort det sjølv i tråd med reglane i § 4-4 på side 16, eller stenge vassforsyninga til eigedommen når abonnementen har søkt om fritak frå gebyr etter reglane i § 3-7 på side 11. Hensikta med regelen er at gebyra skal vera rettferdige.

Kommunen kan berre krevja betaling for desse tenestene viss kommunen faktisk har utført dei. Kommunen kan ikkje legga «straffegebyr» viss abonnementen lèt vera å mælda inn vassmåleravlesing innan den fastsette fristen, men kommunen kan dra til eigedommen og lesa av målaren sjølv og deretter krevja at abonnementen betaler for ekstraarbeidet.

Kommunestyret vedtek satsane for desse ekstratenestene årleg, saman med resten av gebyrregulativet.

§ 1-5 Gebrysatsar

Gebrysatsane vert årleg vedteke av kommunestyret, og trer i kraft frå det tidspunktet kommunestyret avgjer. Gebyra skal fullt ut dekkje kommunen sine kostnadar ved levering av tenestene regulert av denne forskriften.

Gebrysatsane kjem fram av gebyrregulativet, og er tilgjengelege på kommunen sine heimesider.

Gebrysatsane gjeld normalt for eitt kalenderår om gangen og blir vedtatt for det kommande året saman med budsjettvedtaket om hausten. Det gjeldande gebyrregulativet finst her:

<https://www.aal.kommune.no/snarvegar/betalingssatsar/>

Både vatn og avløp er sjølvkosttenester, som betyr at kommunen ikkje har lov til å tene pengar på tenestene. Gebyra for kvar teneste skal berre dekka kostnadene for kommunen ved tenesta, rekna i tråd med reglane i kommunelova § 15-1 og sjølvkostforskrifta. Kommunen kan ha overskot eit enkelt år, men da må overskotet setjast av på eit sjølvkostfond for tenesta, slik at abonnementane over tid ikkje betaler meir enn kva tenesta kostar å levera. Sjølvkostutrekningane er separate for vatn og avløp, så eit eventuelt overskot frå den eine tenesta kan ikkje dekke eit underskot i den andre. Kommunen publiserer ei oppstilling over sjølvkostresultatet på kvar teneste som ein del av årsrapporten kvart år. Dermed har abonnementane moglegheit til å kontrollere at kommunen overheld reglane for utrekning av sjølvkost.

§ 1-6 Arealberekningsmetode

Dersom utrekninga av gebyr vert gjort avhengig av bustaden sin storleik, skal det vere bruksarealet (BRA) rekna etter NS-3940 som dannar grunnlaget for gebyrfastsetjinga.

Dette gjeld berre for dei abonnentane som ikkje har installert vassmålar på eigedommen.

Føresegna følgjer reglane i byggesaksforskrifta og føringsinnstruks for matrikkelen. Sjå òg definisjonen av BRA i § 1-2 bokstav m på side 3.

Seterhus, sel, rorbu, skogs- og utmarkskoie, gamme, frittliggjande garasjar, uthus, anneks, utvendige buer og naust vert ikkje medrekna som bruksareal for bustad- og kombinasjonseigedom. Bygningstyper 171-172 og 181-183 etter NS-3457.

Gjennom utforminga av den lokale gebyrforskrifta kan kommunen velja om ein del bygningar på eigedommen som ikkje nødvendigvis har innlagt vatn, likevel skal rekna med når gebyret blir fastsett etter areal. Det følgjer av forureiningsforskrifta § 16-4 der kommunen er gitt vide rammer for å rekne arealet på ein eigedom som skal inngå i gebyrutrekninga. Ål kommune har valt å bruke denne fridommen til ikkje å krevja gebyr for arealet til bygningar som er beskrivne over, sidan dei normalt ikkje gjer at eigedommen som heilskap har større vassforbruk enn eigedommar utan slike bygningar.

Det inneber at for ein eigedom med ein einebustad og frittliggende garasje skal garasjen inngå i utrekninga av det gebyrpliktige arealet.

Lista over bygningstypar som er sett bort frå er uttømmande, så bygningar som er registrerte i matrikkelen til andre føremål vil inngå i utrekningsgrunnlaget for årsgebyret. Abonnenten kan ta kontakt med kommunen for retting viss dei matrikkelførte opplysningane om eigedommen er feil.

Frå dato denne forskrifta trer i kraft og fram til 1. januar 2024 vert ikkje hus for dyr, landbrukslager, silo og andre landbruksbygningar medrekna som bruksareal for bustad- og kombinasjonseigedom. Bygningstyper 241 og 249 etter NS-3457.

Dette er ei overgangsordning, fordi den nye forskrifta endrar praksisen til kommunen for arealutrekning av landbrukseigedommar. Hovudregelen i forureiningsforskrifta er at eigedommar som brukast til meir eller anna enn bustad skal ha vassmålar. Landbrukseigedommar skal derfor i utgangspunktet ha vassmålar. Likevel manglar fleire eigedommar med landbruksbygningar dette. Fram til den nye forskrifta vart vedtatt var praksisen til kommunen at landbruksbygningar (med bygningstype 241 og 249) ikkje vart rekna med i arealet når gebyret skulle stipulerast, men etter den nye forskrifta skal disse bygningane rekna med. Desse abonnentane vil dermed få høgare gebyr, og sidan landbruksbygningar kan vere ganske store kan gebyraukinga for enkelte abonnentar bli urimeleg stor. Kommunen har derfor valt å gi abonnentar som blir rørt av endringa frist fram til 1. januar 2024 med å installere vassmålar.

Dersom eigedomen sine opplysningar i matrikkelen er mangelfulle, kan kommunen estimere arealet basert på gjennomsnittsoverslag basert på bygningstype. Abonnenten kan sjølv skaffe dokumentasjon på eigedomen sitt gebyrpliktige areal.

Som grunnlag for utrekning av gebyr tar kommunen utgangspunkt i opplysningane i matrikkelen. Opplysningar skal korrigeras dersom dei er feilaktige.

Når årsgebyret blir stipulert basert på areal vil kommunen basere utrekninga på opplysningane til eigedommen som er registrerte i matrikkelen. Samtidig veit vi at opplysningane i matrikkelen kan vere mangelfulle, og av praktiske omsyn kan kommunen derfor basere gebyret på tilsvarande bygningstypar i staden for. Dette er ein unntaksregel som gjeld der ein meiner at matrikkellopplysningane for ein eigedom ikkje gir eit riktig bilde av den verkelege storleiken på eigedommen.

Matrikkelen er det offisielle eigedomsregisteret i Noreg og blir brukt til mange andre formål enn utrekning av vass- og avløpsgebyr. Derfor er det viktig at opplysningane er så riktige som mogleg og blir retta om det blir oppdaga feil. Abonnenten kan sjølv søke opp eigedommen sin på seeiendom.no og melde frå til kommunen viss gebyret er rekna på feil grunnlag eller dei matrikkelførte opplysningane om eigedommen bør rettast av andre grunnar.

Kapittel 2. Tilknytingsgebyr

§ 2-1 Gebyrplikt

Vass- og avløpsanleggslova §§ 3 og 4 pålegg kommunen å krevje tilknytingsgebyr av nye abonnentar. Denne paragrafen regulerer og gjer tydeleg kven (kva eigedommar) som skal betale tilknytingsgebyr, og når dei må betale det.

Gebyr for tilknyting til kommunalt vass- og/eller avløpsanlegg skal betalast for:

- Tilknyting av eigedom.

Når ein ny eigedom blir knytt til leidningsnettet til kommunen for første gang skal det betalast tilknytingsgebyr. Det gjeld også viss tilknytinga skjer gjennom privat samleleidning, som beskrive i § 1-3 på side 3.

Det er hovudsakleg tre typar eigedommar som skal betale gebyr etter denne bokstaven:

- Eigedommar som det blir bygd på for første gang, og der det nye bygget blir knyt til leidningsnettet
- Eksisterande bygningar som har hatt brønn og/eller septiktank eller liknande og som frivillig koplar seg til leidningsnettet til kommunen
- Eigedommar som har vore knytt til eit privat vass- og/eller avløpsanlegg og der anlegget som heilskap blir overtatt av kommunen.

Nummer tre i lista må betale tilknytingsgebyr fordi vass- og avløpsanleggslova krev at kommunen legg tilknytingsgebyr når leidningsnettet blir kommunalt og abonnenten skal byrja å betale årsgebyr til kommunen. Kommunen har ikkje lov til å fråfalle tilknytingsgebyret heilt, men kan setja ein eigen gebrysats for kvar enkelt overtaking. Sjå òg § 2-2 på side 7.

- Tilknyting av eigedom som kommunen krev tilknytt.

Dette punktet heng saman med § 1-3 bokstav b på side 3. Sidan kommunen er pålagt å krevje tilknytingsgebyr, må eigar eller festar òg betale tilknytingsgebyr når det er kommunen som krev tilknyting med heimel i plan- og bygningslova §§ 27-1 og/eller 27-2.

- Eigedom med tilknyting som ikkje er godkjent.

Alle tilkoplingar til kommunalt vass- og/eller avløpsnett skal godkjennast av kommunen og vere i tråd med VA-normen, som er tilgjengeleg på <https://www.va-norm.no/al/>. Dette punktet presiserer at også eigedommar med tilknytingar som ikkje er godkjente av kommunen skal betale tilknytingsgebyr.

Kommunen manglar ofte informasjon om desse tilknytingane, noko som gjer det vanskeleg å krevje inn både tilknytings- og årsgebyr. Når kommunen ikkje burde visst om at eigedommen er tilknytt leidningsnettet er fristen for forelding av gebyrkravet inntil 13 år, etter reglane i foreldelsesloven § 10. Kommunen vil derfor som hovudregel sende krav på tilknytingsgebyr og årsgebyr for inntil dei siste 13 åra når tilknytinga blir oppdaga.

Det er ansvaret til abonnenten at kommunen har tilstrekkelege og korrekte opplysningar om eigedommen og abonnementsforholdet, jamfør § 3-10 til § 3-12 (frå side 14).

Tilknytingsgebyr for tilknyting til vatn og/eller avløp skal ikkje betalast for:

Andre ledd beskriv nokre tilfelle som det ikkje vert kravd tilknytingsgebyr for.

- Seksjonering av allereie tilknytt eigedom.

Dette kan til dømes vere ein firemannsbustad som blir seksjonert etter tilknyting, sånn at kvar bueining blir rekna som ein eigen eigedom. Tilknytingsgebyret er eit eingangsgebyr, og ved seksjonering er tilknytingsgebyr allereie betalt for den opphavlege eigedommen.

- Bygg som har mellombels tilknyting i opptil tre år, til dømes brakkerigg. Dersom tilknytinga varer i meir enn tre år, skal det verte kravd tilknytingsgebyr.

Kommunen krev ikkje tilknytingsgebyr for mellombelse tilknytingar. Viss tilknytinga varer lenge nok til at ho må sjåast på som permanent, skal det krevjast tilknytingsgebyr likeins som for andre eigedommar. Av praktiske omsyn er den grensa sett til tre år.

- Særskild tilknyting av sprinklaranlegg.

Det skal ikkje betalast tilknytingsgebyr for sprinklaranlegg som har eiga tilknyting til vass- og avløpsnettet.

Sprinklaranlegg betaler heller ikkje forbruksgebyr, sjå § 3-4 på side 9. Sprinklaranlegg medfører likevel eigne abonnementsgebyr, jamfør § 3-3 på side 8. Abonnementsgebyret skal bidra til å dekke ekstra-kostnadene knytt til at infrastrukturen og vassforsyninga er dimensjonert for krava sprinklaranlegg stiller. Gjeldande gebrysatsar er oppgitt i gebyrregulativet.

- Tiltak som utvidar eigedomen sitt gebyrpliktige bruksareal etter § 1-6.

Viss tilknytingsgebyret blir rekna ut i frå det tilknytte arealet opnar lovverket for at kommunen legg tilleggsgebyr viss arealet aukar etter at tilknytinga har skjedd. Her vel kommunen å *ikkje* bruka den moglegheita.

Døme på situasjonar der kommunen elles ville kravd tilleggsgebyr er at det blir bygd eit ekstra hus på ein eigedom som allereie er tilknytt, eller at huset på eigedommen blir riven og det blir bygd eit nytt, større hus.

§ 2-2 Utforming av gebyra

Tilknytingsgebyret er eit eingongsgebyr og vert betalt etter fastsette kategoriar i gebyrregulativet.

Tilknytingsgebyr-satsane blir vedteken av kommunestyret og publiserast i gebyrregulativet saman med satsane for abonnements- og forbruksgebyr.

Om kommunen overtek private vass- og/eller avløpsanlegg kan kommunen fastsette særskilt sats i det enkelte tilfelle.

Som beskrive i kommentar til § 2-1 første ledd bokstav a på side 6 må kommunen krevje tilknytingsgebyr frå abonentar som er knytt til privat vass- og/eller avløpsanlegg når kommunen overtar anlegget. Kommunen kan ikkje fråfalle kravet heilt, men kan fastsetja eigne satsar i kvart enkelt tilfelle. Kommunestyret vil fatte eit vedtak i samband med kvar overtaking. Gebyret kan setjast både lågare enn den ordinære satsen, viss det opplevast urettferdig at abonentane betaler gebyr for at anlegget blir overtatt av kommunen, og høgare enn den ordinære satsen. Ein høgare gebyrsats kan til dømes vera aktuell viss anlegget som blir overtatt er i svært dårlig teknisk stand og det vil vera urimeleg å pålegge alle dei eksisterande abonentane til kommunen å betale for å oppgradere anlegget til ein akseptabel standard.

For bustadar skal eingongsgebyret for tilknyting utgjere eit fast beløp per bueining.

Sjå definisjonar av bustad i § 1-2 bokstav j på side 3 og bueining i § 1-2 bokstav i på side 2.

For nærings- og kombinasjonseigedom skal eingongsgebyret for tilknyting utgjere eit fast beløp per eigedom som er tilknytt.

Sjå definisjon av næringseigedom i § 1-2 bokstav l, kombinasjonseigedom i § 1-2 bokstav k og eigedom i § 1-2 bokstav a.

§ 2-3 Ansvar og betaling

Den som er abonent på det tidspunktet gebyrplikta oppstår, er ansvarleg for betaling av gebyret.

Sjå definisjon av abonent i § 1-2 bokstav b på side 1. Gebyrplikta oppstår når eigedommen blir kopla til kommunal leidning, sjå § 2-1 på side 6.

Gebyret vert fakturert etter gjeldande sats når igangsetjingsløyvet vert gjeve. For eksisterande bygg med tilknyting som ikkje er godkjend, vert tilknytingsgebyr betalt etter gjeldande sats på det tidspunktet kravet vert framsett eller foreldingsfristen sitt utgangspunkt, jamfør foreldelsesloven § 3.

Kommunen sender faktura på tilknytingsgebyret samtidig som det blir gitt løyve til å setja i gang byggearbeida på eigedommen («igangsetjingsløyve»).

Viss kommunen oppdagar tilknytingar som ikkje tidlegare er melde inn og godkjent, blir gebyret fakturert med den satsen som gjeld på tidspunktet kommunen får vite om tilknytinga.

Tilknytingsgebyr skal vere betalt før tilknyting.

Faktura for tilknytingsgebyr må vere betalt før den fysiske tilknytinga skjer. Gebyret må uansett vere betalt før tilknytinga blir godkjent av kommunen, og godkjent tilknyting til vatn og avløp er ein føresetnad for å få ferdigattest.

Kapittel 3. Årsgebyr

Dette kapittelet regulerer årsgebyret, altså gebyret abonnementane betaler for løpende tilgang til og bruk av vass- og avløpstenestene. Årsgebyret er bygd opp av ein fast del (abonnementsgebyret) og ein variabel del (forbruksgebyret). Kapittelet regulerer kven som skal betale årsgebyr, oppbygning av gebyret, inkludert korleis abonnements- og forbruksgebyret blir rekna, og dessutan forskjellige reglar for reduksjon av eller tillegg i gebyra.

§ 3-1 Gebyrplikt

Årsgebyr skal betalast for alle eigedomar som:

- er tilknytt kommunalt vass- eller avløpsanlegg, eller
- er gebyrpliktig etter § 1-3 første ledd bokstav b.

Plikta til å betale årsgebyr følgjer den generelle gebyrplikta som er fastsett i § 1-3 på side 3, og omfattar altså eigedommar som er tilknytt eller som kommunen har kravd tilknytt i medhald av plan- og bygningslova § 27-1 eller § 27-2.

Årsgebyr reknast frå den tidlegaste av dato for mellombels bruksløyve eller dato da eigedomen blei tatt i bruk i tilfelle der mellombels bruksløyve ikkje er gitt. For mellombels tilknytingar blir årsgebyr rekna frå dato for tilknyting til dato når tilknytingen blir avslutta.

Her blir det bestemt når abonnementen skal betale årsgebyr frå. Hovudregelen er at kommunen fakturerer årsgebyr frå same dato som abonnementen får mellombels bruksløyve for eigedommen. Det blir altså ikkje fakturert årsgebyr i byggeperioden. Viss eigedommen ikkje har mellombels bruksløyve, noko som mellom anna gjeld ein del eldre bygningar, blir gebyret fakturert frå det tidspunktet eigedommen faktisk er tatt i bruk.

For mellombelse tilknytingar skal det betalast årsgebyr frå dato tilkoplinga reint fysisk skjer til tilkoplinga blir stengd igjen.

Gebyrplikta er uavhengig av om det er utandørs tappepunkt/vasspost eller om det er innlagt vatn.

Abonnementen må betale årsgebyr så lenge det er vatn tilgjengeleg på eigedommen, uavhengig av om vatnet er tilgjengeleg inne i ein bygning eller om ein må gå ut til eit tappepunkt for å hente det.

§ 3-2 Gebyret sitt oppbygnad

Årsgebyra for vass- og avløpstenester er samansett av to delar:

- Abonnementsgebyr (fast del).
- Forbruksgebyr (variabel del).

Inntektene frå abonnementsgebyret skal fortrinnsvis dekkje vass- og avløpstenesta sine forventa kapitalkostnadar.

Kor stor del av årsgebyret som skal vere fast og variabel del, vert kvart år fastsett i gebyrregulativet.

Gjennom den lokale forskrifta kan kommunen velja om årsgebyret skal vere todelt eller berre bestå av eit forbruksledd – her blir det slått fast at gebyret skal vera todelt og bestå av eit fast abonnementsgebyr og eit variabelt forbruksledd.

Hensikta med det er at kommunen skal få faste inntekter over abonnementsgebyret til å dekke faste kapitalkostnader på tenesteområdet. På den måten blir svingingar i gebyrnivået redusert litt frå år til år, fordi kommunen er sikra inntekter til å dekka dei kostnadene som ikkje forsvinner viss forbruket går ned. Kapitalkostnadene vil variere noko frå år til år, og spesielt over fleire år sidan kommunen investerer i nye anlegg. Kor stor del av gebyret som skal vere fast må òg balanserast mot at abonnementen bør ha tilstrekkeleg oppmoding til å redusere vassforbruket. Dette inneber normalt at dei samla inntektene av forbruksgebyret minst bør utgjera halvparten av dei samla årsgebyrinntektene. Forholdet mellom dei to gebyrkompontentane vil variere frå år til år og er derfor ikkje fastsett i forskrifta. Forholdstalet blir fastsett i det årlege gebyrregulativet der dei vedtekne gebyrsatsane blir presenterte.

§ 3-3 Abonnementsgebyr

Føresegna regulerer korleis abonnementsgebyret blir rekna for kvar type eigedom. Det blir vist til gebyrregulativet for dei konkrete betalingssatsane, men reglene her set rammene for gebyrstrukturen kommunestyret skal bestemme satsane innanfor.

Bustadeigedom skal betale abonnementsgebyr som ein fast sats per bueining. Eigedom med hybel eller sokkelleilegheit betaler ikkje abonnementsgebyr for første bueining som er hybel eller sokkelleilegheit.

Sjå definisjon av bustadeigedom i § 1-2 bokstav j på side 3, og dessutan bueining i § 1-2 bokstav i.

Abonnementsgebyret er ein fast sats som gjeld for alle bustadeigedommar, og det skal betalast eitt abonnementsgebyr per bueining. Ein einebustad betaler eitt abonnementsgebyr, medan ein tomannsbustad betaler 2 gangar satsen for abonnementsgebyr. Eit leilegheitsbygg med 20 leilegheiter betaler 20 gangar satsen for abonnementsgebyr.

Bustader som har éin hybel eller sokkelleilegheit betaler berre eitt abonnementsgebyr, sjølv om hybelen eller sokkelleilegheita oppfyller kriteria til å vera eiga bueining og elles ville vore kravd for gebyr. Frå og med bueining nummer tre vert det betalt eitt abonnementsgebyr per «ekstra bueining». Med «hybel eller sokkelleilegheit» er det meint uteigje av mindre enn hovuddelen av bustaden abonnenten sjølv bur i.

Fritidseigedom skal betale abonnementsgebyr etter fastsett sats per bueining i gebyrregulativet.

Sjå definisjon av fritidsbustadeigedom i § 1-2 bokstav j på side 3, og dessutan bueining i § 1-2 bokstav i.

Satsen per bueining for fritidseigedommar kan vere ein annan enn satsen per bueining for heilårsbustader.

Eigarseksjonssameige med felles vassmålar i bygning kor det både er bueiningar og brukseiningar med næringsverksemde skal betale abonnementsgebyr som ein fast sats per brukseining.

Sjå definisjon av bueining i § 1-2 bokstav i og brukseining i § 1-2 bokstav h på side 2.

Dette kan til dømes gjeld bygningar med eit butikklokale i første etasje og leilegheiter i etasjane over. Satsen per bo- og brukseining kan vere forskjellig frå kvarandre og forskjellig frå satsane for andre typar eigedommar.

Nærings- og kombinasjonseigedom skal betale abonnementsgebyr etter fastsette kategoriar som speglar vassforsyningsskapasiteten til den einskilde eigedom. Kategoriane kjem fram av gebyrregulativet. For sprinklaranlegg gjeld eigne satsar.

Sjå definisjon av næringseigedom i § 1-2 bokstav l og kombinasjonseigedom i § 1-2 bokstav k på side 3.

Desse eigedommane vert delte inn i kategoriar basert på vassforsyningsskapasitet. På den måten betaler eigedommar som potensielt kan bruke mykje vatn eller sleppa på mykje avløpsvatn og meir, og dekker på den måten kostnader dei påfører kommunen til å bygge og drifte større vassverk, reinseanlegg og leidningar med stor kapasitet.

Kategoriane blir fastsette basert på historisk maksimalforbruk, fordi dette er rekna som eit godt, presist og samtidig, tilgjengeleg mål på forsyningsskapasiteten til eigedommen. Sjølv om abonnementsgebyret på denne måten blir fastsett basert på eit forbrukstal, betyr ikkje det at abonnementsgebyret blir avhengig av forbruket. Når eigedommen først er sett i ein kategori er det nemleg ikkje meiningsa at kategorien skal endraast, før det eventuelt kjem nye opplysningar om at kategorifastsettelsen er feil. Reduksjon i forbruket gir ikkje grunnlag for endring av kategori.

Gebyret for kvar kategori blir fastsett ved at det blir bestemt ein grunnsats og så betaler kvar eigedom grunnsatsen multiplisert med ein kategorifaktor. Til dømes vil eigedommar i næringskategori 5 betala 24 grunnsatsar.

Årleg abonnementsgebyr (kr/år)	Eining/tal
Kategori 1 (0-300 m ³)	1
Kategori 2 (301-1.000 m ³)	3
Kategori 3 (1.001-3.000 m ³)	6
Kategori 4 (3.001-6.000 m ³)	12
Kategori 5 (6.001-20.000 m ³)	24
Kategori 6 (20.001-50.000 m ³)	50
Kategori 7 (50.001-150.000 m ³)	100

Grunnsatsen kan vere forskjellig frå abonnementsgebyret for bueiningar og andre typar brukseiningar. Sprinklaranlegg kan også ha eigne abonnementsgebyr.

§ 3-4 Forbruksgebyr

Føresegne her fastset dei generelle rammene for forbruksgebyret. Sjå gebyrregulativet som er publisert på heimesida til kommunen for betalingssatsar kvart enkelt år.

Abonnentane skal betale forbruksgebyr etter målt eller stipulert vassforbruk i m³. Både kommunen og abonnenten kan krevje at forbruksgebyret vert fastsett ut frå målt forbruk. Dersom forbruksgebyret allereie er fastsett ut frå målt forbruk kan dette ikkje reverserast slik at forbruket blir rekna ut etter stipulert vassforbruk.

Denne føresegna fastset regelen om at forbruksgebyret avheng av vassforbruk i kubikkmeter (m³). Viss abonnenten har vassmålar skal gebyret reknast ut etter det målte forbruket, elles skal forbruket stipulerast basert på eigedommens gebyrpliktige bruksareal, sjå § 1-6. Både kommunen og abonnenten kan krevje at det skal brukast vassmålar, og ein kan ikkje bytte tilbake til stipulert forbruk viss vassmålar først er installert. Føresegna følgjer reglane i forureiningsforskrifta § 16-4.

Sjå nærmare reglar om betaling etter målt forbruk i § 3-5 på side 10 og om betaling etter stipulert forbruk i § 3-6 på side 11.

Sjå også definisjon av abonnent i § 1-2 bokstav b på side 1.

Det vert ikkje gjeve nedsett forbruksgebyr for storforbrukarar av vatn.

Vassforbruk til sprinklaranlegg er ikkje gebyrpliktig.

Ikkje utbygd eigedom som ikkje er tilknytt skal ikkje betale forbruksgebyr.

Desse tre setningane gir spesialregler for enkelte typer eigedommar. Dei følgjer i stor grad av andre føresegner i forskrifterna eller overordna regelverk og er mest meint som ein presisering og for å gi tydeleg informasjon.

Den første seier at det ikkje blir gitt kvantumsrabatt på forbruksgebyret. Kvantsumsrabatt er ulovleg, så det er ikkje noko kommunen kunne valt å gjera, men det er likevel formålsteksten å informere om det her. Forbruksgebyret har altså den same satsen for alle, med unntak av eventuelle eigne avtalar som følgjer av reglane i § 3-7 sjunde ledd på side 11.

Kommunen kan velje å la vatn til sprinklaranlegg vere gratis, og har gjort det gjennom forskriftsteksten over. Det er gjort fordi sprinklaranlegg har veldig uføresieleg vassforbruk (dei bruker ikkje vatn, før dei plutsleger brukar store mengder vatn). Dei er dermed vanskeleg å budsjettera med og kan medføre store svingingar i gebyra, samtidig som kommunen ikkje ønsker at vassgebyret skal vere ein hindring for å installere eller bruke sprinklaranlegg. Når brannvesenet bruker kommunalt vatn til å sløkke brannar blir dei heller ikkje belasta vassgebyr for det, så regelen her likestiller på den måten sprinklaranlegg med andre sløkkeløysningar.

Etter vass- og avløpsanleggslova § 3 har kommunen lov til å krevje gebyr frå eigedommar som ikkje er bygd ut i visse tilfelle. I § 1-3 om generell gebyrplikt på side 3 har kommunen valt å ikkje bruke denne moglegheita. Teksten her følgjer opp dette ved å presisere at desse eigedommane ikkje skal betale forbruksgebyr.

Som hovudregel gjeld at avløpsmengda vert rekna lik vassmengda ved utrekning av forbruksgebyr. Unntak frå dette er nemnt i § 3-7, sjette ledd.

Det er ikkje vanleg med eigne avløpsmålarar i bustadhus, så det er ein vanleg føresetnad at alt vatn som blir målt inn i huset òg blir antatt å sleppast på avløpsnettet igjen. Ved utrekning av forbruksgebyret for avløp blir forbruket derfor sett likt som for vatn. Ved stipulert forbruk er arealet som blir lagt til grunn ved utrekninga av både vass- og avløpsforbruk uansett det same, og føresegna her gjer at kommunen må fastsetje den same omrekningsfaktoren frå areal til stipulert forbruk.

For næringseigedomar med veldig stor ulikskap mellom vasstilførsel og påslepp av avløp kan det fastsetjast eigne utrekningsmåtar, som beskrive i § 3-7 sjette ledd. Det kan til dømes vere aktuelt for gardsbruk som vatnar jordene med kommunalt vatn, sidan det vatnet ikkje blir sloppe på det kommunale avløpsnettet etterpå. Eit anna døme er produksjonsbedrifter som bruker kommunalt vatn i tilverkinga av produkta sine, sidan desse vil bruke mykje meir vatn enn dei slepp ut på avløpsnettet igjen.

§ 3-5 Betaling etter målt forbruk

Føresegne fastset spesifikke reglar for utrekning av forbruksgebyr basert på vassmålar.

Forbruksgebyr skal betalast for rapportert årsforbruk. Følgande eigedomar skal betale etter målt forbruk og ha vassmålar installert:

- Næringseigedom, medrekna bygg for offentlege føremål.
- Kombinasjonseigedom, medrekna eigedomar med ei eller fleire bueiningar i tillegg til ei eller fleire bygningar for fiskeri eller landbruk.
- Anlegg med varig eller mellombels tilknyting i samband med oppføring av bygg eller anlegg. Dette gjeld også for anlegg på ein ikkje utbygd eigedom som kunne vere kravd tilknytt etter plan- og bygningsloven § 27-1 eller § 27-2 dersom den hadde vore utbygd.

For desse eigedommane krev kommunen at det skal installeras vassmålar, med heimel i § 3-4 første ledd. Sjå definisjonar av næringseigedom i § 1-2 bokstav l på side 3 og kombinasjonseigedom i same paragraf bokstav k.

Bokstav c her kan til dømes vere anleggsbrakker og andre konstruksjonar som blir nytta mellombels medan den permanente bustaden på ein eigedom blir oppført.

Dersom det ikkje er mogleg å installere vassmålar kan kommunen fastsetje eit stipulert forbruk.

For mellombelse tilknytingar kan kravet om vassmålar fråvikast dersom vassmengda kan verte fastsett på andre måtar.

Desse to setningane er unntak frå kravet om vassmålar. Viss det er umogleg å installere vassmålar kan kommunen i staden stipulere forbruket, også for næringseigedommar som normalt skal ha vassmålar i tråd med regelen her og forureiningsforskrifta § 16-4. «Umogleg» skal tolkast strengt for å unngå at unntaket blir utholt, men vil inkludere tilfelle der det er teknisk mogleg å installere vassmålar, men det vil vere så dyrt at det er urimeleg å pålegge abonnenten kostnaden ved installasjonen. Unntaket gjeld som hovudregel berre for bygning som eksisterte da kravet om å installere vassmålar ble sett fram. Kommunen antar at nye bygningar byggjast slik at vassmålar lett kan installeras seinare, viss kommunen vedtek å krevje vassmålar hos alle abonnentane.

Mellombelse tilknytingar kan sleppe å installere vassmålar utan omsyn til kvar vanskeleg det eventuelt måtte vere, så lenge vassmengda kan fastsetjast presist nok på andre måtar. I praksis inneber det at ein kan la vere å installere vassmålar viss stipulert forbruk basert på areal vil gi eit riktig bilde av vassforbruket.

§ 3-6 Betaling etter stipulert forbruk

Føresegna fastset spesifikke reglar for utrekning av forbruksgebyr utan vassmålar. Ho må lesast i samanheng med § 3-4 på side 9 og arealutrekningsreglane i § 1-6 på side 5.

Abonnentar som meiner det stipulerte forbruket for eigedommen deira blir feil etter desse reglane kan krevje at forbruksgebyret blir fastsett etter målt forbruk i staden for, sjå § 3-4 første ledd.

Eigedom som ikkje har vassmålar, skal betale forbruksgebyr etter stipulert forbruk.

Stipulert forbruk reknast ut frå eigedomen sitt bruksareal, jamfør § 1-6, multiplisert med ein faktor for vassforbruk per kvadratmeter BRA. Faktoren kjem fram av gebyrregulativet.

For eigedommar som ikkje har vassmålar må grunnlaget for forbruksgebyret reknast ut på ein annan måte. Forureiningsforskrifta § 16-4 seier at forbruket da skal stipulerast (vert rekna eller vert estimert) ut frå arealet til busetnaden. Paragrafen her gjennomfører den regelen. Kommunen har stor fridom til å velje korleis «arealet til busetnaden» skal fastsetjast, og har gitt reglar om det i § 1-6 på side 5.

Arealet for kvar eigedom skal multipliserast (gongast) med eit omrekningstal som gir estimert vassforbruk for eigedommen. Kommunestyret vedtek omrekningsfaktoren og publiserer han i gebyrregulativet. For tida er omrekningsfaktoren sett til 1,2 m³ per m² bruksareal, noko som inneber at eit bustadhus på 100 m² BRA vil betale for eit årleg forbruk på 120 m³. Omrekningsfaktoren er meint å gi omrent lik forbruksutrekning for bustader med stipulert forbruk som for bustader med vassmålar. Han er sett i tråd med gjeldande oppmodingar frå Norsk Vann, som har basert dei på data om vassforbruk blant abonnantar med vassmålar.

For fritidsbustad skal faktoren for vassforbruk være halvparten av faktoren for bustadeigedom.

Fritidsbustader vert nyttå mindre enn heilårsbustader, og for å speglia dette har kommunen vedtatt at omrekningsfaktoren mellom areal og stipulert vassforbruk skal vere halvparten av faktoren som gjeld for heilårsbustader.

§ 3-7 Reduksjon av eller tillegg til årsgebyr

Føresegna inneheld forskjellige reglar om når kommunen kan redusere årsgebyret for ein abonnent, og når han kan rekne gebyrtilllegg. Forvaltningslova § 40 seier at kommunen ikkje kan fråvike si eige forskrift på annan måte enn det forskrifa sjølv opnar for. Paragrafen her, saman med § 3-8, er derfor ei uttømmende liste over når kommunen kan gi redusert gebyr eller tillegg i årsgebyret for enkeltabonnentar.

Restriksjonar på vassforbruket, avbrot i vassleveransen eller i mottak av avløpsvatn gjev ikkje grunnlag for reduksjon av gebyra.

Det er vanlegvis ikkje aktuelt å setje ned gebyret viss den vanlege drifta av vass- og/eller avløpsanlegget blir forstyrra. Det inkluderer mellom anna fullstendig avbrot i leveransen, men også mindre driftsproblem som gjer at kommunen sender ut kokevarsel. Det må vere sånn, fordi normal drift av eit vass- eller avløpsanlegg inneber at det blir stansa av og til, mellom anna for å gjennomføre nødvendig vedlikehald. Det er òg forventa at kortvarige avbrot kan skje som følgje av forhold kommunen ikkje rår over, til dømes plutselige leidningsbrot. Desse avbrota i drifta vil som hovudregel vera så kortvarige at ein eventuell gebyrreduksjon ville vore heilt ubetydeleg for abonnenten, samtidig som reduksjonsordninga ville vore veldig dyrt for kommunen å administrere.

Likevel finst § 3-8 nedanfor om gebyrreduksjon etter reglane i forbrukarkjøpslova, som gir abonnenten rett på redusert gebyr i ein del avbrotsituasjonar jamvel om dei ikkje har rett på det etter § 3-7 første ledd.

Kommunen skal normalt varsle abonnentane i forkant av planlagde driftsavbrot.

Eigedom som står ubrukt eller fråflytta i meir enn eit år kan søke om berre å betale fastledd. Er bustad/bygg på eigedomen fjerna, eller øydelagd slik at den ikkje kan verte brukt, betalast berre fastledd inntil stikkleidning er fråkopla (plugga) ved hovudleidninga. § 3-7 andre ledd første punktum gjeld ikkje fritidsbustadar.

Føresegna regulerer når kommunen kan setje forbruksgebyret til 0 kroner.

Alle eigedommar som ikkje er fritidsbustad, kan søke om å sleppe forbruksgebyr når dei skal stå ubrukt eller fråflytta i meir enn eitt år. Svaret på søknaden er eit enkeltvedtak som abonnenten kan klaga på etter reglane i § 6-1 på side 20. Første punktum er mest aktuell for bustader utan vassmålar, fordi kommunen ikkje har lov til å vurdere bruken av eigedommen når det stipulerte forbruket blir rekna. For eigedommar med vassmålar skjer dette automatisk, sidan ingen bruker vatn på eigedommen likevel.

Fritidsbustader vil naturleg stå ubrukte i lengre periodar, og har dessutan lågare omrekningfaktor enn heilårsbustader, så desse kan ikkje søka om fritak etter denne føresegna. Abonnenten kan likevel krevje å få forbruket fastsett med vassmålar, og vil da oppnå ein tilsvarende effekt som fritak etter regelen her, viss fritidsbustaden står ubrukt over lengre tid. Sjå òg § 3-4 på side 9 og reglane for installasjon og bruk av vassmålar i Kapittel 4.

Viss busetnaden på eigedommen er fjerna eller ikkje kan nyttast som bustad treng ikkje abonnenten å søke om fritak frå forbruksgebyr, det blir innvilga automatisk. Det er likevel ansvaret til abonnenten å informere kommunen om endringa i abonnementforholdet for at fritaket skal kunne nyttast, sjå òg § 3-10 på side 14. Abonnenten må betale abonnementsgesbyr/fastledd i tråd med § 3-3 (side 8), fram til tidspunktet når stikkledninga til eigedommen fysisk er kopla frå hovudleidningen til kommunen.

Ved fråflytting grunna flytting til eldreheim og liknande, kan det søkjast særskilt om reduksjon av gebyra til kommunen.

Abonnentar som flytta på eldreheim eller liknande kan få redusert gebyr etter individuell søknad og vurdering, uavhengig av kor lenge dei forventar å ikkje bu i bustaden sin. Kommunen har ikkje lov til å ta omsyn til sosiale kriterium ved fastsetting av vassgebyret, og hensikta med unntaket her er å fange opp endringa i vassforbruket som følgje av at bustaden blir ståande varig ubrukt fordi abonnenten ikkje kan bu der lenger. I søknaden må abonnenten sannsynleggjere at formålet med føresegna er oppfylt og at ingen andre kjem til å bruke bustaden i perioden abonnenten sjølv er fråverande. Dette inkluderer mellom anna ektefelle/sambuar som ikkje flytta på eldreheim samtidig og leigetakrar i sokkelleilegheit.

Som hovudregel skal kommunen berre innvilge redusert forbruksgebyr etter denne regelen, slik at gebyret for abonnentar med stipulert forbruk blir likt som for abonnentar med målt forbruk i den same situasjonen.

Ved søknad til kommunen kan abonnenten få fritak for årsgebyret når eigedomen fysisk vert fråkopla kommunalt leidningsnett. Det er kommunen som skal stå for fråkoplinga og abonnementet tek slutt når plombering er utført.

Viss kommunen gir løye til å kople eigedomen frå leidningsnettet faller samtidig plikta til å betale gebyr bort. Spesifikt skal abonnenten ikkje lenger svare gebyr når eigedomen fysisk er kopla frå leidningsnettet til kommunen, ved å plombere stikkledninga ved hovudleidningen.

Bustadhus kan som hovudregel ikkje koplast frå og framleis nyttast som bustadhus etterpå, jamfør mellom anna plan- og bygningslova §§ 27-1 og 27-2.

Ny tilknyting av eigedomen utløyser ikkje ny betaling av eingongsgebyr for tilknyting. Både arbeidet med å kople frå og ny tilknyting vert utført for abonnenten sin kostnad og etter kommunen si tilvising. Om kommunen utførar stenging eller påsetjing av vassforsyninga vil kommunen krevja betaling etter standardisert sats til dekning av kommunen sine kostnadar. Satsen kjem fram av gebyrregulativet.

Dette gjeld spesifikt eigedommar som kommunen har gitt løye til å kople frå leidningsnettet: når desse blir knytt til nettet på nytt utløyser ikkje det eit nytt tilknytingsgebyr.

Kommunen bestemmer korleis frå- og tilkopling skal skje. Alle kostnader ved frå- og tilkopling skal dekkast av abonnenten. Kommunen kan godkjenne at privat røyrliggjar utfører arbeidet eller velje å utføre arbeidet sjølv. Viss kommunen gjer jobben skal abonnenten dekke kostnadane til kommunen etter standardiserte satsar for slikt arbeid. Kommunestyret vedtek satsane og publiserer dei i gebyrregulativet.

For eigedom som ikkje vert brukt som bustad, og der avløpsmengda er vesentleg større eller mindre enn vassforbruket, kan avløpsgebyret verte rekna ut frå målt avløpsmengd, eller verte fastsett etter særskild avtale med kommunen.

Sjå definisjon av næringseigedom i § 1-2 bokstav I på side 3, eventuelt òg bustadeigedom i same paragraf bokstav j.

Denne føresegna følgjer elles reglane i forureiningsforskrifta § 16-5 fjerde ledd. Dette er til dømes aktuelt for gardsbruk som vatnar jordene med kommunalt vatn, sidan hovudregelen om vatn inn = vatn ut elles gir altfor høg avløpsmengde samanlikna med det reelle påsleppet. Korleis avløpsmengdene skal målast må abonnenten avtale med kommunen i kvart enkelt tilfelle. Vanlege løysingar er eigne avløpsmålarar eller at abonnenten har fleire vassmålarar, der målar-verdiane på nokon av dei blir trekta frå ved utrekninga av avløpsmengdene.

Abonnenten skal dekke kostnaden ved installasjon og årleg vassmålarleige, også ved fleire målarar, i tråd med § 4-3 på side 16.

For eigedom der avløpsvatnet si samansetjing avvik frå vanleg hushaldsavlop og verkar fordyrande på drift og vedlikehald av kommunen sitt avlopsanlegg, kan kommunen fastsetje eit tillegg til avløpsgebyret til dekning av meirkostnadane. I slike tilfelle vert det inngått ein separat avtale mellom kommunen og abonnenten.

Føresegna følgjer forureiningsforskrifta § 16-5 fjerde ledd. Målet er at abonnentar med avløpsvatn som har uvanlege eigenskapar, og derfor er ekstra dyrt å reinsa, skal dekke ekstrakostnadene dei påfører kommunen. Regelen er til dømes relevant for meieri og liknande produksjonsbedrifter som slepp på veldig feithaldig avløpsvatn på leidningsnettet slik at kommunen får ekstrakostnader til å halde røyra opne.

Kommunen kjem til å inngå ein eigen avtale med abonnenten om korleis tilleggsgebyret skal reknast ut. Avtalen skal normalt nytte Norsk Vanns rapport 149/2006 «Tilførsel av industrielt avløpsvann til kommunalt nett» som utgangspunkt, på grunn av at han mellom anna inneholder eit forslag til utrekningsmetodikk og vanlege grenseverdiar for kva som bør reknast å avvika frå «vanleg kommunalt avløpsvatn». Kommunen og abonnenten er likevel ikkje bundne av rapporten og kjem til å avtale den nøyaktige utrekningsmetodikken, inkludert grenseverdiar og liknande, i kvart enkelt tilfelle.

Norsk Vann 149/2006 er tilgjengeleg her: https://va-kompetanse.no/wp-content/uploads/rapport149_2006.pdf

§ 3-8 Gebyrreduksjon i medhald av forbrukerkjøpsloven sine reglar om prisavslag

Denne føresegna bør lesast i samanheng med § 3-7 første ledd på side 11. Hovudregelen der er at abonnenten ikkje kan krevje redusert gebyr ved avbrot i vass- eller avløpstenesta. Samtidig har ikkje kommunen lov til å ta frå abonnentane rettar dei har etter forbrukerkjøpslova, så paragrafen her inneholder reglar for når eit avbrot i forsyninga blir sett på som ein mangel etter forbrukerkjøpslova, og derfor likevel gir abonnentar som er forbrukarar rett på prisavslag.

Forbrukerkjøpslova er tilgjengeleg hos Lovdata: <https://lovdata.no/dokument/NL/lov/2002-06-21-34>

Det er berre abonnentar som også er forbrukarar som direkte blir omfatta av reglane her. «Forbrukar» er definert i forbrukerkjøpslova § 1 tredje ledd, der det står at «Med forbrukar blir meint ein fysisk person som ikkje hovudsakleg handlar som ledd i næringsverksemd..». Det følgjer eksplisitt av forbrukerkjøpslova § 2 første ledd bokstav b at lova gjeld «levering av vatn». Forarbeida til forbrukerkjøpslova (Ot.prp. nr. 44 (2001–2002), særleg pkt. 3.8.9) argumenterer for at ein også kan nytta reglane i kjøpslova i spørsmål om vassforsyning, så abonnentar som er næringsdrivande kan også gjera mangelkrav gjeldande overfor kommunen etter dei tilsvarende reglane i kjøpslova.

Føresegna gjeld ikkje viss feilen berre gjeld avløpstenesta. Det har si årsak i fleire ting, hovudsakleg at bortleding og reinsing av avløpsvatn blir sett på som ei teneste (og ikkje kjøp av ei vare) og det fell dermed utanfor rekkevidda til både forbrukerkjøpslova og kjøpslova. Vidare er det sjeldan avbrot i avløpstenesta som medfører at forbrukaren ikkje får den tenesta ho betaler for. Viss kommunen ikkje overheld reinsekrava før utslepp til recipienten kan kommunen få böter, men abonnenten har framleis fått den tenesta gebyret skal dekke. Viss det er avbrot i vassforsyninga som gir rett til gebyrreduksjon etter denne paragrafen skal abonnenten likevel også som hovudregel ha redusert avløpsgebyret. Avløpsmengda er definert ved at vatn inn = vatn ut for dei aller fleste abonnentane, men spesielt for abonnentar med stipulert forbruk er det vanskeleg å fange opp at avløpsforbruket går ned når vassforsyninga sviktar. Derfor må abonnentane også få redusert avløpsgebyr etter paragrafen her.

Kommunen har også erstatningsansvar i ein del situasjonar der avløpsnettet påfører abonnentane skadar, sjå forureiningslova § 24 a. Ansvaret er delvis avgrensa av reglar i Standard Abonnementsvilkår.

Interesserte leesarar kan lesa meir om temaet, og kva avgrensingar som generelt gjeld for å hevde at vassleveransen er mangelfull i Guttorm Jacobsens «VA-juss» frå 2011, som er tilgjengeleg her: https://va-jus.no/wp-content/uploads/2011/11/Vann_og_avlopsrett_kap_3-office.pdf

Abonnenten har rett til reduksjon i gebyr (prisavslag) ved feil eller mangel ved vassforsyninga i medhald av forbrukerkjøpsloven sine reglar om prisavslag. Abonnenten har rett til redusert forbruksgebyr dersom ikkje-varsla avbrot i vassforsyninga varer i meir enn 24 timer.

Vilkår for gebyrreduksjon er at mangelen er skulda forhold på kommunen si side, til dømes forureining i vasskjelde eller feil ved kommunalt anlegg. Kommunen pliktar å bidra til å avklare ansvarsforholdet.

Forbrukartvistutvalet si praksis har lagt til grunn at det gjeld ei minstegrense før manglar ved vassforsyninga kan gi rett på prisavslag. Kommunen har derfor bestemt at følgjande vilkår må vere oppstilt før mangelen er vesentleg nok:

- 1) det må vere avbrot i vassforsyninga i meir enn 24 timer
- 2) avbrotet må ikkje vere varsle på førehand.

3) avbrotet må skyldast noko kommunen elles har kontroll over, slik som kvaliteten på drikkevasskjelda eller kommunens eigne anlegg. Viss avbrotet skuldar feil på stikkleidninga til abonnenten er det ikkje ein mangel som kan gi grunnlag for prisavslag.

Generell tilråding om kokning som tryggleikstiltak etter trykkfall som følgje av reparasjon, spyling, brannsløkking mv., gjev ikkje gebyrreduksjon.

Generelle råd om kokning av drikkevatnet fordi vatnet kan vere forureina etter normale driftsoppgåver på leidningsnettet blir ikkje rekna som manglar som kan gi grunnlag for prisavslag. Trykkfall i delar av nettet viss det blir brukt veldig mykje vatn andre stader (til dømes ved brannsløkking) vert også rekna som normale forhold i denne samanhengen. Dette er heilt vanlege og nødvendige konsekvensar av ordinær drift av vassforsyningssystemet, og er dermed noko abonnenten må rekne med at skjer av og til.

Krav om redusert gebyr må verte fremja innan to månader etter at forholdet oppstod, dersom ikkje kommunen har fatta eige vedtak om gebyrreduksjon.

Sats for gebyrreduksjon vert fastsett i gebyrregulativet.

Abonnenten er sjølv ansvarleg for å krevje redusert gebyr innan fristen viss ikkje kommunen fattar eige vedtak om gebyrreduksjon som gjeld fleire abonnentar. Årsgebyret blir redusert med 0,3 % per påbyrja døgn utover det første døgnet. 0,3 % svarar til ein 365-del kvar dag mangelen haldt fram.

§ 3-9 Pålegg om utbetring

Kommunen kan krevje dekt alle kostnadene direkte knytt til tiltak som følgje av at abonnenten har unnlatt å etterkome pålegg om å utbetre lekkasjar på eigedomen si vassleidning eller manglar ved avløpsanlegg eller sanitærutstyr. Ved omlegging eller utbetring av avløpsleidningar kan kommunen krevje at eigar av tilknytt stikkledning set i verk tilsvarende omlegging eller utbetring.

Dette følger av Standard Abonnementsvilkår administrative føresegn punkt 1.5. Abonnenten skal til kvar tid halde private vass- og avløpsanlegg, medrekna private stikkledningar, i den standen som er beskriven i Standard Abonnementsvilkår tekniske føresegn. I korte trekk inneber det at dei ikkje skal ha lekkasjar som medfører fare for forureining eller liv og helse, og dessutan vere bygd på ein teknisk tilfredsstillande måte når det kjem til høgdeforskjellar mellom hovudleidning og sanitærinstallasjonar i bygningen, tilbakeslagsvern og liknande.

Dersom anlegget ikkje er i samsvar med krava kan kommunen pålegge abonnenten å utbetre anlegget for eiga rekning. Som hovudregel skal abonnenten få ein rimeleg frist til å utføre arbeidet, der abonnenten sjølv er ansvarleg for å skaffe kvalifisert hjelp til å utføre arbeidet (les: bestille røyrleggar). Viss abonnenten lèt vere å etterkomme pålegget innan fristen kan kommunen sjølv gjennomføre pålegget og krevje kostnadene sine dekt av abonnenten. Det same gjeld viss kommunen oppdagar feil på private anlegg og arbeidet ikkje kan utsetjast. Merk at «gjennomføre pålegget» ikkje betyr at kommunen sjølv må gjere jobben – kommunen kan òg krevje at abonnenten dekker kostnadene ved arbeidet viss kommunen får private firma til å gjere jobben for seg.

Gebyrpliktig som unnlatt å etterkome pålegg om utbetring av lekkasjar som medfører forureining kan verte kravd tvangsmult etter forurensningsloven § 73.

Dette er den vanlege regelen om tvangsmult for å sikre gjennomføring av føresegn frå forureningslova. Det er staten, og ikkje kommunen, som får inntektene frå tvangsmult etter regelen her. Sidan regelen er plassert i forureningslova gjeld ho berre anlegg og tilfelle som blir omfatta av den lova. For vass- og avløpsanlegg inneber det at det stort sett berre er lekkasje frå private avløpsleidningar som det kan vere aktuelt for kommunen å bruke denne føresegna på.

§ 3-10 Ansvar for opplysingar om abonnement

Abonnenten skal melde frå til kommunen om endringar i abonnementsforholdet. Eventuelle feil som oppstår som følgje av at abonnenten forsømer denne plikten blir løyst i tråd med §§ 3-11 og 3-12.

Føresegna fastset at det er abonnenten sitt ansvar å sørge for at kommunen har korrekte opplysingar om abonnementsforholdet. Sjå òg definisjon av abonnent i § 1-2 bokstav b på side 1.

§ 3-11 Ansvar for gebyra

Abonnenten har ansvar for betaling av årsgebyret, uansett om gebyrkravet er retta mot abonnenten eller annan rekningsmottakar.

Altså: det er ansvaret til abonnenten at gebyrkravet blir betalt, sjølv viss kommunen har utskrive gebyrfakturaen i namnet til nokon andre, har sendt fakturaen til feil adresse eller liknande. Kravet følger av definisjonen av abonnent og den generelle gebyrplikta i § 1-3 på side 3, sidan det er eigar av gebyrpliktig eigedom som skal betale gebyr.

Den praktiske konsekvensen av denne føresegna er at kommunen kan setje i verk tvangsinndriving overfor abonnenten viss gebyret ikkje blir betalt, uavhengig av kvifor gebyret ikkje er betalt. Gebyrkravet er sikra med lovpart i eigedommen, sjá panteloven § 6-1. Sjá òg kommentarar til § 5-1 på side 19.

Panteloven er tilgjengeleg hos Lovdata: <https://lovdata.no/dokument/NL/lov/1980-02-08-2>

Abonnentar som samarbeider om felles vass- eller avløpsmålar, er solidarisk ansvarlege for gebyra. Gjeld slikt samarbeid eit sameige etter eierseksjonsloven, er kvar abonnent ansvarleg for ein del av gebyret i samsvar med sin eigarpart, dersom ikkje anna fordeling er fastsett i sameiget sine vedtekter eller bindande vedtak i sameiget.

«Solidarisk ansvarlege» betyr at alle som delar på den same målaren er ansvarlege for heile gebyret, og kommunen kan setja fram gebyrkravet mot kven som helst av dei. Viss éin person på den måten endar med å betale vass- og/eller avløpsgebyret for fleire andre må abonnentane sjølv rydde opp seg imellom etterpå.

I sameiger regulert av eigarseksjonslova blir kvar bueining rekna som ein eigen eigedom, og abonnentane er berre ansvarlege for gebyr tilsvarende eigardelen sin i sameiget. Normalt vil det vere ein lik del på kvar bueining, men sameiget kan fastsetja anna fordeling, og i så fall skal fordelinga til sameiget leggast til grunn.

Det er etter avtale med kommunen høve til fellesfakturering av eigedomar med fleire bu- eller brukseiningar, til dømes seksjonerte leilegheiter.

Dette er hovudsakleg meint å gjelde leilegheitsbygg, der det kan vere praktisk at sameiget får rekninga for alle bueiningane og fordeler gebyret på abonnentane over felleskostnadene i staden for at kvar abonent får eiga rekning. I burettslag er burettslaget abonnenten, så der vil normalt burettslaget få samlefaktura for alle bueiningane utan at ein må inngå eigen avtale om det. Sjå også definisjonen av abonent i § 1-2 bokstav b på side 1.

§ 3-12 Retting av feil gebyrberekning

Har mangelfulle eller feil opplysningar ført til feilaktig utrekning av gebyr, skal utrekninga rettast og differansen verte gjort opp. Krav som er forelda etter reglane om forelding av fordringar, vert normalt ikkje dekt. Krav vert normalt forelda etter tre år, jamfør foreldelsesloven § 2.

Ved å peika på «utrekning av gebyr» viser forskriftsteksten at føresegna her regulerer kva som skjer viss kommunen har hatt feil opplysningar om tekniske aspekt ved eigedommen eller vassforbruket, og har rekna vassforbruket for høgt eller for lågt som følgje av det, eller har plassert eigedommen i feil kategori for abonnementsgesbyr.

Den alminnelege fristen for forelding er tre år, men foreldelsesloven opnar for at nokre krav kan ha forlengte fristar, hovudsakleg der den som har kravet ikkje visste eller burde visst om at kravet eksisterte. Det vil som hovudregel vere lite aktuelt for krav etter denne føresegna, fordi kommunen føreset at abonnenten kontrollerer fakturaene frå kommunen og kjenner utrekningsgrunnlaget for sin eigen eigedom. Kommunen på si side har fleire moglegheiter til å skaffe informasjon om eigedommen eller basere utrekningane på gjennomsnittsbetraktnings (sjå mellom anna § 1-6 på side 5), så det er generelt føresett at kommunen også kan oppdaga feil i utrekningane innan rimeleg tid.

Samtidig er det ei kjent sak at i mange kommunar har eigedommar vore kopla til leidningsnettet utan at kommunen har fått melding om det. Kommunen veit normalt ikkje om slike ulovlege tilknytingar og har inga moglegheit til å gjøre seg kjent med dei heller. Da kan foreldelsesfristen forlengast i opptil 13 år, i tråd med foreldelsesloven § 10. Kommunen vil som hovudregel krevje tilknytings- og årsgebyr tilbake til tidspunktet for tilknyting (avgrensa oppover til 13 år) når kommunen blir kjent med slike tilkoplinger.

Kapittel 4. Føresegner for installasjon og bruk av vassmålar

Kapittelet inneholder reglar om installasjon av vassmålar, eigartilhøve og kostnader ved å ha vassmålar, og dessutan reglar rundt bruk og vedlikehald av målaren.

Både kommunen og abonnenten kan krevje at forbruket på ein eigedom blir fastsett ved hjelp av målar, sjå § 3-4 på side 9.

§ 4-1 Målartypar

Føresegnene for vassmålarar gjeld tilsvarende for eventuelle avløpsmålarar. Føresegnene gjeld for vass- og avløpsmålarar med fjernavlesing så langt dei passar.

At føresegnene «gjeld tilsvarande» for avløpsmålarar tyder at reglane i dette kapittelet gjeld fullt ut for avløpsmålarar, sjølv om teksten i kvar paragraf berre refererer til vassmålarar.

At reglane gjeld for fjernavlesne vassmålarar «så langt dei passar» tyder at reglane i dette kapittelet i utgangspunktet gjeld fullt ut også for fjernavlesne målarar, men at enkelte føresegn eller delar av føresegn kan falle bort fordi dei ikke er aktuelle. Det er til dømes tilfellet for reglane om avlesing av vassmålar i § 4-4 (side 16) -- sidan kommunen automatisk les av fjernavlesne målarar utan hjelp av abonnenten er den føresegna ikkje relevant for den typen målarar. Det er ikkje nødvendig å opplyse i den enkelte paragrafen om den gjeld for fjernavlesne målarar eller ikkje, men det kan vere gjort enkelte stader.

§ 4-2 Installasjon

Kommunen avgjer kor mange vassmålarar den einskilde eigedom skal ha, og dessutan type, storleik og plassering på vassmålaren.

Dette gjeld også viss det er abonnenten som krev forbruket fastsett med vassmålar. Kommunen vil vanlegvis krevje at det vert installert éin vassmålar på hovud-vassinntaket til eigedomen.

For nokre eigedommar kan det vere formålstenleg med fleire vassmålarar, til dømes landbrukseigedommar med fleire bustadhus og driftsbygningar. Landbrukseigedommar skal ha installert vassmålar innan 1. januar 2024, i tråd med reglane i § 1-6 på side 5. Desse eigedommane kan òg ha anna avløpsmengde enn vassmengda dei får levert, og dessutan sleppe på avløpsvatn av annan kvalitet enn vanlege hushald, sånn at reglane om reduksjon i, eller tillegg til, årsgebyret i § 3-7 sjette og sjuande ledd (side 11) kan vere aktuelle.

Kommunen skal godkjenne den som skal stå for installasjon og vedlikehald, og dessutan eventuell flytting, utskifting eller fjerning av målaren.

Kommunen må kunna stole på at målaren gir eit riktig bilde av forbruket på eigedommen. Kommunen er òg avhengig av å få melding om arbeidet som er gjort så abonnentregisteret kan bli oppdatert. Derfor krev kommunen at alle som skal arbeide på vassmålarar er godkjente på førehand, så kommunen kan vere sikker på at dei er kjent med rutinane som gjeld for installasjon av vassmålarar og kva meldingar kommunen skal ha etterpå.

Arbeid på vassmålarar er uansett røyrliggjararbeid som må utførast av kvalifiserte fagfolk.

Abonnentar som har behov for arbeid på vassmålaren sin kan ta kontakt med kommunen for informasjon om kven som kan utføra arbeidet. Røyrliggjarar som ønsker godkjenning kan ta kontakt med kommunen for å få informasjon om forventningane og krava kommunen har til arbeid med vassmålarar, og dessutan rutinane til kommunen for innrapportering av informasjon om målaren.

Dersom eksisterande eigedom med vassmålar vert oppdelt i nye eigedomar, skal kvar av de nye eigedomane ha eigen vassmålar.

Sjå definisjonen av eigedom i § 1-2 bokstav a på side 1. Denne føresegna er til dømes aktuell viss ei tomt skilst frå ei eksisterande tomt eller viss ei tomt med fleire bustadhus blir seksjonert.

Abonnentar kan samarbeide om felles vassmålar der det vil vere særleg kostbart å installere eigen målar for kvar eining. Årsgebyr vert fordelt på abonnentane etter reglane i § 3-11 andre ledd.

Dette er til dømes aktuelt viss eit bustadsameige skal installere vassmålar i eit leilegheitsbygg. § 3-11 andre ledd seier at abonnentane som delar vassmålar vanlegvis vil vere solidarisk ansvarlege for gebyrkravet. Det betyr at kommunen kan krevje heile beløpet frå kven som helst av dei, og så er det opp til den som betalte gebyret for alle å krevje pengar tilbake frå dei ho delar vassmålar med. Sjå òg kommentarane til § 3-11 på side 14.

Pålagt vassmålar for ny eigedom skal vere installert seinast når det vert gjeve mellombels bruksløyve eller eigedomen vert teke i bruk, og for eksisterande eigedom når den vert tilknytt. Dersom dette vert unnlata, skal abonnenten betale stipulert årsgebyr etter § 3-6.

§ 3-5 på side 10 inneholder reglar om kva eigedommar som er pålagt å ha vassmålar.

Mellombels bruksløyve må normalt givast av byggesaksavdelinga i kommunen før eigedommen kan takast i bruk, og vil ikkje bli gitt før pålagde vassmålarar er installerte i tråd med reglane til kommunen.

For eksisterande eigedommar skal målar vere installert seinst når eigedommen blir kopla fysisk til hovudleidningsnettet til kommunen.

For installasjon og bruk av vassmålar gjeld elles kommunen sine tekniske føresegner.

Kommunen kan gi eigne tekniske reglar om installasjon og vassmålar. Opplysningar om dette kan fåast ved førespurnad til kommunen.

For tida er det tekniske føresegn i Standard Abonnementsvilkår som gjeld, kommunens VA-norm (<https://www.vanorm.no/al/>), i tillegg til det som står i denne forskrifta.

§ 4-3 Eigarforhold og kostnad

Ved installasjon av ny vassmålar skal kommunen stå som eigar av denne. Installasjonskostnadene vert dekt av abonnenten. For anskaffing og vedlikehald av vassmålaren vert det betalt ei årleg leige. Pris for leige av vassmålar kjem fram av gebyrregulativet. Dersom ein vassmålar vert borte eller skadd, skal abonnenten omgåande melde dette til kommunen. Kommunen tek etterhald om retten til å krevje full erstatning for tap eller skade.

Nokre abonnentar har installert vassmålar etter gammalt regelverk og eig han sjølv. Denne nye forskriften seier at kommunen skal eiga alle nye vassmålarar som vert installerte, noko som tydar at eigarskapet for eksisterande målarar vert overført til kommunen når dei blir skifta ut neste gong. Kommunen ønsker å eiga vassmålarane mellom anna for å kunna inkludere vassmålardekning og -utskifting som ein del av den heilskaplege VA-planlegginga i kommunen.

På noverande tidspunkt har kommunen ingen ambisjon om å pålegge alle abonnentar å ha vassmålar, men både kommunen og kvar abonnent kan krevje at forbruket blir fastsett med målar (sjå § 3-4 på side 9). For ein del abonnentar krev forureiningsforskrifta som utgangspunkt at forbruket skal målast, og for desse har kommunen fastsett krav om målar i § 3-5 på side 10. Reglane i kapittelet her gjeld uavhengig av om det er abonnenten eller kommunen som har kravd installasjon av vassmålar.

Sidan kommunen ikkje pålegg alle abonnentar å ha vassmålar er det òg bestemt at kostnaden ved å installere vassmålar skal betalast av abonnenten sjølv. Dette er vanleg praksis frå andre kommunar med tilsvarende vassmålardekning. Vidare skal det betalast vassmålarleige til dekning av ekstrakostnader kommunen har knytt til kvar vassmålar. Vassmålarleiga vil normalt setjast til omrent 1/10 av kostnaden ved å skifta ut éin vassmålar, slik at abonnenten dekker kostnaden ved å skaffe og installere ny vassmålar over levetida til vassmålaren. Vassmålarleiga er oppgitt i gebyrregulativet. Det er berre abonnentar med kommunalt eid vassmålar som betaler vassmålarleige.

Sidan vassmålaren er eigedommen til kommunen blir abonnenten pålagd òg å melde frå til kommunen viss noko skjer med han, og dessutan at abonnenten kan bli erstatningsansvarleg for tap eller skade viss abonnenten kan klandrist for («er skuld i») det som har skjedd med vassmålaren. Sjå òg § 4-5 på side 17.

§ 4-4 Avlesing av vassmålar

Abonnenten skal lese av vassmålaren så nær fastsett tidspunkt for avrekning som mogleg og sende resultatet til kommunen innan fastsett frist. Tidspunkt for avlesing vert fastsett i gebyrregulativet.

Det er abonnenten sitt ansvar å lese av vassmålaren og sørge for at resultatet blir sendt til kommunen. Sjå definisjon av abonnent i § 1-2 bokstav b på side 1.

Unnlèt abonnenten å lese av vassmålaren kan kommunen etter purring fastsetje årsgebyret etter skjøn. Dersom abonnenten unnlèt å foreta avlesing kan kommunen sjølv setje i verk avlesing utan ytterlegare varsel til abonnenten og krevje særskild gebyr (frammøtegebyr) for å dekkje kommunens kostnad med dette. Satsen for betaling kjem fram av gebyrregulativet.

Viss abonnenten ikkje har meldt inn resultatet av målaravlesinga til kommunen innan fristen kan kommunen

1) Stipulere årsgebyret, basert på tidlegare års avlesingar, forbruket for tilsvarende eigedommar og/eller andre relevante moment, eller

2) Reise til eigedommen og lese av målaren sjølv utan ytterlegare varsling til abonnenten.

Viss kommunen må lese av vassmålaren kjem kommunen til å krevje at abonnenten dekker kostnadene kommunen har med arbeidet, etter standardiserte satsar som kjem fram av gebyrregulativet. Satsane blir fastsette per oppmøte, slik at viss kommunen ikkje får tilgang til vassmålaren kan abonnenten bli pålagt nytt oppmøtegebyr for kvar gang kommunen forsøker å lese av målaren.

§ 4-4, første og andre ledd gjeld ikkje abonnentar med fjernavlesing av vassmålar.

Reglane i § 4-4 (denne paragrafen) er i praksis ikkje relevante for fjernavlesne vassmålarar. Sidan kommunen leser dei av automatisk treng ikkje abonnenten å gjere noko for å melde inn resultatet. Abonnenten kan heller ikkje påleggast oppmøtegebyr viss kommunen vel å nytte fjernavlesne vassmålarar med såkalla «drive-by-løysing», der avlesinga skjer med bilmontert utstyr som samlar data frå vassmålarar i nærlieiken.

§ 4-5 Tilsyn og vedlikehald

Abonnenten skal halde vassmålaren lett tilgjengeleg for avlesing, tilsyn og vedlikehald.

Dette inneber at det ikkje skal stablast ting føre målaren eller liknande som gjer den vanskeleg tilgjengeleg. Føresegna må sjåast i samanheng med andre og tredje ledd om at abonnenten skal føre tilsyn med målaren og at kommunen kan krevje tilgang til målaren for å føre tilsyn med han.

Det er abonnenten som har ansvaret for at pliktene etter føresegna her blir følgd, sjå definisjon av abonnent i § 1-2 bokstav b på side 1.

Abonnenten skal føre tilsyn med vassmålaren. Abonnenten er også ansvarleg for å følgje med på forbruksutviklinga, slik at lekkasjar eller feil vert oppdagat snarast mogleg. Vert ein vassmålar skadd eller går tapt, skal abonnenten straks melde frå til kommunen. Broten plombering av vassmålaren vert også rekna som skade.

Det er i all hovudsak i eigeninteressa til abonnenten å følgja med på forbruksutviklinga, sidan ho må betala for det vatnet som går til lekkasje òg. Til dømes kan eit toalett som renn medføre auka forbruk på fleire hundre kubikkmeter i året, og tilhøyrande vesentleg auka vass- og avløpsgebyr.

Kommunen kan føre tilsyn med vassmålaren. Kontrollør frå kommunen skal legitimere seg utan oppmoding.

Kommunen vil òg varsle tilsyn på førehand, slik at abonnenten får tid til å vere til stades når tilsynet skal gjennomførast.

§ 4-6 Avrekning ved feilmåling

Dersom vassmålaren ved kontroll viser meir enn 5 % for høgt forbruk, har abonnenten krav på tilbakebetaling av for mykje betalt årsgebyr som følgje av feilmålinga. Er plomberinga broten, har abonnenten ikkje krav på tilbakebetaling.

Føresegna fastset ei grense for når avviket er så stort at abonnenten kan krevje tilbakebetaling. Føresetnad er at plomberingen av målaren er i orden.

Tilbakebetalinga vert rekna frå det tidspunkt ein legg til grunn at feilen må ha oppstått.

Dette må avgjerast i kvart enkelt tilfelle, og vil til dømes vere tidspunkt abonnenten melder frå om skade på vassmålaren etter § 4-5 over. Tidspunktet kan i særlege tilfelle setjast til tidspunktet for installasjonen, viss det er sannsynleg at misvisinga skuldast ein produksjonsfeil ved målaren.

Krav som er forelda etter foreldelsesloven, vert ikkje dekt.

Hovudregelen er at krav blir forelda etter tre år, jamfør foredelingsloven § 2. Lova har òg nokre tilleggsfristar som hovudsakleg er aktuelle viss ein ikkje burde kjent til kravet. Abonnenten er pålagt å følgje med på målaren og mælda frå ved mistanke om feil i § 4-5 andre ledd (sjå førre paragraf) og kommunen ser derfor på krav om tilbakebetaling som følgje av feilmåling som kjent for abonnenten og føreset at dei blir melde til kommunen innanfor den alminnelege foredelingsfristen.

Viser vassmålaren meir enn 5 % for lågt forbruk, har kommunen krav på tilleggsbetaling etter tilsvarande reglar.

Hensikta med vassmålar er nettopp at abonnenten skal betale for det faktiske forbruket sitt, så reglane om tilbakebetaling må gjelde symmetrisk viss målaren viser for lite forbruk òg. Sidan kommunen har rett til å krevje kontroll etter § 4-7 og kan skifte ut målaren etter § 4-8 er det føreset att kommunen blir kjent med eventuelle avvik innan rimeleg tid. Dermed vil det ikkje under nokon omstende vere aktuelt for kommunen å krevje tilleggsbetaling som følgje av feilmåling utanfor den alminnelege foredelingsfristen.

§ 4-7 Nøyaktigheitskontroll

Både kommunen og abonnenten kan krevje nøyaktigheitskontroll av vassmålaren.

Dersom kontrollresultatet ligg utanfor feilmarginen etter § 4-6, vert det utført ei justering, eventuelt utskifting av vassmålaren, utan utgifter for abonnenten. Dersom abonnenten har kravd nøyaktigheitskontroll og det ikkje vert påvist feil utanfor feilmargin, vert kostnadane betalt av abonnenten.

Føresegna regulerer betaling for presisjonskontroll. Både kommunen og abonnenten kan krevje kontroll, og viss kontrollen viser at vassmålaren måler meir enn 5 % feil skal det rettast. Retting skjer enten ved justering av målaren eller ved at vassmålaren blir skifta heilt ut. Det er kommunen som bestemmer om vassmålaren skal justerast eller skiftast, sjå òg § 4-8 nedanfor.

Abonnenten skal ikkje betale for å få utbetra målefeil, uavhengig av kven som har kravd kontrollen. Viss kontrollen derimot viser at vassmålaren ikkje hadde feil likevel, skal kostnaden ved kontrollen bli dekt av den som kravde kontrollen.

§ 4-8 Utskifting og flytting

Er målenøyaktigheita for dårleg, bestemmer kommunen om vassmålaren skal verte justert eller utskifta. Når vanleg levetid for ein vassmålare er nådd, kan kommunen bestemme at vassmålaren heilt eller delvis skal skiftast ut.

Sjå òg § 4-7 over om nøyaktigheitskontroll. Basert på resultatet av kontrollen bestemmer kommunen kva som skal gjerast for å bringe målenøyaktigheita tilbake til akseptable nivå. Kommunen kan òg skifte ut vassmålarar når dei har nådd den vanlege tekniske levetida si, normalt 10-15 år etter dei vart installerte.

Nye målarar som blir installerte, også ved utskifting av eksisterande vassmålarar, er eigde av kommunen i tråd med § 4-3 på side 16. Føresegna her gjeld òg vassmålarar som er eidd av abonnenten: kommunen kan bestemme at dei skal skiftast ut og vil da bli eigar av den nye vassmålaren som vert installert.

Kommunen kan krevje flytting av vassmålar som er plassert i strid med kommunen sine krav til plassering. Abonnenten kostar på slik flytting.

Føresegna blir antatt å vere mest aktuell for eldre, abonnenteide målarar som vart installerte før kommunen etablerte eigne retningslinjer for installasjon av målarar. Nye målarar skal installerast av personell kommunen har godkjent på førehand, i tråd med § 4-2 på side 15, og kommunen antar dei vert installert i tråd med krava kommunen har til plassering.

Kapittel 5. Innbetaling av årsgebyr

§ 5-1 Innbetaling

Forfalle krav på årsgebyr er sikra med pant i eigedomen etter panteloven § 6-1. Gebyra kan verte kravd inn av kommunen etter reglar for innkrevjing av skatt.

Dette tyder at når forfallsdato på fakturaen med årsgebyret er passert, har kommunen automatisk etablert panterett føre alle andre krav i den eigedommen kravet gjeld. Det same gjeld feie- og renovasjonsgebyret. Viss kravet ikkje blir betalt ved forfall kan kommunen krevje eigedommen tvangsseld til dekning for gebyrkravet, i tråd med reglane i tvangfullbyrdingsloven kapittel 11.

Relevante lover hos Lovdata:

Panteloven: <https://lovdata.no/lov/1980-02-08-2/>

Tvangfullbyrdingsloven: <https://lovdata.no/dokument/NL/lov/1992-06-26-86>

Abonnementsgebyr og forbruksgebyr vert innkravd på felles faktura.

Forbruksgebyret vert betalt à konto basert på rapportert forbruk. Avrekning skjer på 1. termin (faktura) året etter.

Heile årsgebyret blir fakturerert på den same fakturaen, men kan spesifiserast på forskjellige fakturalinjer.

For abonnementar med vassmålar vil forbruksgebyret fakturerast med ei antatt mengde (à konto) basert på det registrerte forbruket for førre år. Deretter blir det gjort avrekning basert på vassmålaravlesinga på første faktura året etter.

Sjå elles reglar om fastsetjing av abonnements- og forbruksgebyr i Kapittel 3.

Når ein abonnent får installert vassmålar gjeld reglane for stipulert forbruk frem til dato for installasjon av målaren forutsett at denne er godkjend av kommunen etter reglane i § 4-2.

Vassmålar skal installerast av personell som på førehand er godkjent av kommunen, sjå § 4-2 på side 15. Abonnementar som får installert vassmålar betaler gebyr for målt forbruk frå datoén målaren vert installert.

Faktura vert sendt til abonnent, eller til annan rekningsmottakar etter avtale.

Eigedomar med felles vassmålar og som har avtalt med kommunen at dei skal fakturerast felles, vert fakturerert via ein eigar/festar av eigedomen eller særskild avtalt rekningsmottakar.

Som hovudregel sender kommunen gebyr-fakturaen til abonnenten, sjá definisjon av abonnent i § 1-2 bokstav b på side 1. Samtidig er det opna for at abonnenten kan avtale med kommunen at nokon andre skal få fakturaen. Det kan til dømes vere aktuelt viss heile eigedommen er leigd ut for ein periode på nokre år og det er formålstenleg at leigetakaren får fakturaen tilsendt direkte.

Abonnementar kan òg dele vassmålar i tråd med reglane i § 3-11 på side 14 og § 4-2 på side 15. Då er abonnementane solidarisk ansvarlege for gebyret, noko som betyr at kommunen kan krevje heile gebyret frå éin av dei og så er det opp til den abonnenten å krevje resten av abonnementane for delen deira. Det blir regulert her, der føresegna seier at kommunen kjem til å sende rekning til éin av dei, eventuelt til ein særskilt avtalt rekningsmottakar.

Årsgebyra vert kravd inn over eit tal terminar som vert fastsett i gebyrregulativet.

For tida er gebyret fordelt på 2 terminar. Abonnementen kan òg velje mellom å få faktura 1, 4 eller 6 gonger i året, føresett at dei samtidig aksepterer å få fakturaen elektronisk.

§ 5-2 Manglande innbetaling

Dersom årsgebyret ikkje er betalt innan ein månad etter at den gebyrpliktige har motteke andre gongs varsling om innbetaling, kan kommunen stenge den kommunale vassforsyninga til eigedomen så framt kommunelegen ikkje motset seg avstenginga.

Kommunen kan gje den gebyrpliktige eit gebyr i samband med stenging og påsetjing av vassforsyninga. Gebyret kjem fram av gebyrregulativet.

I staden for å krevje tvangssal som beskrive i kommentaren til § 5-1 første ledd kan kommunen stenge vassforsyninga etter reglane i paragrafen her. Føresetnaden er at kommunelegen ikkje motset seg stenginga. Føresegna er derfor i første omgang relevant for eigedommar utan fast busetting (næringseigedommar og fritidseigedommar), sidan eigedommar må ha tilfredsstilande tilgang på reint drikkevatn for å kunne brukast som bustad.

Stenging av vatnet etter denne føresegna stengjer ikkje for krav om tvangssal av eigedommen for å dekke gebyrkravet, men gir kommunen eit mindre inngripande verkemiddel som kan brukast der ein trur det vil gi betre effekt.

Kapittel 6. Avsluttande bestemmingar

§ 6-1 Klage og omgjering

Reglane for å klage på ting kommunen bestemmer finst hovudsakleg i forvaltningslova, som er tilgjengeleg hos Lovdata på <https://lovdata.no/dokument/NL/lov/1967-02-10>

Etter forvaltningslova § 28 er det berre enkeltvedtak ein kan klaga på. Forskriftsfesta reglar gjeld mange, uspesifiserte personar og må påverkast gjennom vanlege demokratiske prosessar, mellom anna ved å sende høyringssvar til kommunen når nye forskrifter blir lagd ut på høyring. Ved enkeltvedtak, som gjeld éin eller nokre få nærmere fastsette personar, kan personane vedtaket gjeld og andre som har såkalla «rettsleg klageinteresse i saka», klage over vedtaket som kommunen har fatta. Normalt vil det vere abonnenten som har rettsleg klageinteresse i enkeltvedtak som gjeld vass- og avløpsgebyr.

Dei stadene det står ting som «kommunen kan bestemme at» eller «i tvilstilfelle avgjer kommunen» i denne forskrifta er avgjerda til kommunen ofte eit enkeltvedtak. Døme på slike avgjerder er § 1-6 fjerde ledd, som seier at viss matrikkellopplysningsane om ein eigedom er mangelfulle kan kommunen bestemma at gjennomsnittsarealet for bygningsstypen skal leggast til grunn for utrekning av vassforbruket, eller § 3-7 andre til fjerde ledd som handlar om forskjellige grunnlag for å søke kommunen om redusert gebyr.

Det er ikkje høve til å klage på gebyr som er fastsett i kommunen sitt gebyrregulativ, jamfør forvaltningslovens føresegner.

Einskilde vedtak gjort i medhald av denne forskrifta, kan klagast til særskild klagenemnd, jamfør forvaltningsloven § 28 andre ledd.

Gebyr må betalast innan forfallsdato sjølv om gebyrvedtaket er klaga inn.

Gebyret må betalast sjølv om abonnenten har klaga på vedtaket og ventar på svar. Viss abonnenten får redusert gebyr som følgje av klaga vil kommunen betale tilbake differansen.

§ 6-2 Ikraftsetjing

Forskrifta trer i kraft 1. januar 2022.

Frå same tid vert tidlegare forskrifter om vass- og avløpsgebyr i Ål kommune oppheva.

